

東

華

錄

東華錄

康熙十四

臣王先謙敬編

周潤蕃恭校

康熙十三年甲寅春正月戊辰先是 上遣副都統擴爾坤駐防
太原未行至是以西安官兵調往四川命擴爾坤移駐西安○諭
將軍瓦爾喀朕思賊兵必犯巴蜀爾所部官兵無多應戰應守宜
熟籌以行爾須兼程前進當卽令將軍赫業胡禮布等率領大兵
隨後爲爾應援又諭將軍赫業胡禮布瓦爾喀等京城所發官兵
聽赫業胡禮布統轄西安官兵聽瓦爾喀統轄兩軍會合時毋得
各分彼此致有不睦須同心協力副朕委任○辛未以李贊元爲
兵部督捕右侍郎由左副都御史遷 ○戶部議准御史馬大士奏罰俸銀
兩非贓私可比官旣革職無俸可扣亦照貪官贓銀追比似屬可

憫應請凡內外各官在任時所罰俸銀革職後免其追取從之○
癸酉湖廣總督蔡毓榮奏賊兵抵清浪衛逼近沅州亟請大兵馳
救諭蔡毓榮鄂善桑峨聞賊兵逼近沅州爾等前屢奏已調總兵
官徐治都李芝蘭等率兵應援何至今未報到沅可速遣往督提
俱在荊州沅州要地豈可獨委總兵官崔世祿一人應令桑峨領
兵疾馳赴沅協同固守蔡毓榮等亦須酌量以行大兵不久卽至
○諭兵部近聞京城小民驚恐欲於城外西山處所遷移逃避殊
非朕撫安百姓之意前令緝獲假稱朱三之楊起隆與良民毫無
干涉並無驅逐居民移居城外之事卽昨暫閉城門因有人舉首
楊起隆潛藏大城之內故行嚴緝非有他故爾百姓勿妄聽詐言
致生疑畏宜各安生業如平時爾部卽轉行五城御史順天府大
宛二縣作速刊示通行曉諭○乙亥 上諭太和殿遣甯南靖寇

大將軍順承郡王勒爾錦安西將軍赫業師行諭曰行軍之道惟得民心爲要所過宜厚加撫卹嚴禁侵掠誠能無犯秋毫則百姓安矣至官兵暴露良苦亦宜拊循其進止處所謹設斥堠周防勿懈南方卑溼念吾軍士遠役或不習水土猝有疾病可致良醫以藥餌調治之其有勞績者卽向所司支給賞賚勿致踰時諭畢

上詣堂子行禮祭旗纛還出西長安門送之行命王以下副都統以上俱乘馬馳而過復遣內大臣禮部兵部大臣錢於郊外○增兵部繙譯主事一○丙子改江西巡撫董衛國湖廣巡撫張朝珍工部尚書銜爲兵部尚書浙江巡撫田逢吉四川巡撫羅森工部侍郎銜爲兵部侍郎○丁丑以薩海爲內閣學士由內閣侍讀學士遷○改鄂善爲雲南貴州總督由雲南總督改○己卯以于可託爲左副都御史

由宗人府
府丞遷

○庚辰

上御保和殿召朝覲布政使徐國相等入見

命各陳地方利弊○湖廣總督蔡毓榮奏賊於十二月二十九日
陷沅州總兵官崔世祿被執澧辰路梗 上命大將軍順承郡王
勒爾錦於所領兵內每佐領先出驍騎二名以都統一員領之繼
都統巴爾布之兵速往荊州並令都統巴爾布護軍統領伊爾度
齊額司泰等於所領護軍內簡選肥馬以護軍統領一員領之繼
前鋒統領碩岱之兵馳赴荊州○癸未刑部等衙門會審黃裁縫
等黨附楊起隆謀逆一案具奏得旨黃裁縫等十二人俱凌遲處
死餘犯俱改爲卽行處斬各犯親屬本應依律正法但牽連甚多
朕心不忍著從寬免罪人口家產並免入官郎廷樞從優議敘○
甲申命德州滄州及順義等十處駐防滿兵會於德州以都統尼
雅翰爲鎮南將軍將之尼雅翰奏請增兵竟往武昌俟大將軍師
克定湖廣臣願率兵從廣西進取議政王大臣會議令尼雅翰與

副都統席布仍領德州等處駐防官兵往兗州會同駐防副都統
馬哈達分兵爲三擇馬肥者尼雅翰席布領之先往安慶馬瘠者
速令餽養馬哈達領之繼往安慶其察哈爾兵同往餘兵以副都
統根特巴圖魯領之防守兗州奏入報可尼雅翰臨行授之敕印
令馬哈達席布參贊軍務○丙戌安南國王嗣黎維祚奏臣兄安
南國王黎維禧病故屬臣權管國事並遣陪臣胡士揚等進康熙
八年十一年歲貢下部知之黎維祚又奏臣先國王世守安南國
內皆臣疆土後被逆臣莫登席篡弑賴輔國政鄭穩之祖勦除恢
復莫逆遺孽篡據國內高平地方乍臣乍叛傳至莫元清懼臣國
擎解乃潛入內地以先投誠爲名特爲避罪之計康熙八年欽差
使臣李仙根宣到 聖旨令還莫元清高平府臣兄黎維禧不勝
鬱結欽奉 省命敢不祗遵但莫元清爲臣不共之晉高平爲臣

世守之土叛逆竊據爲後嗣者實難甘心叩懇天恩仍令高平屬歸本國又莫元清向有誓詞及祭伊父莫敬耀文內有圖逆天朝之語今謹進呈並進乞恩方物得旨該部議奏所進方物著發還○丁亥侍衛夸賽自荊州馳還奏偏沅巡撫盧震棄長沙奔岳州上命都統覺羅朱滿領兵速赴武昌諭曰閩巡撫盧震已棄長沙奔岳州朕念武昌重地不可不豫爲防守爾可率兵卽往如有賊至務期保固地方賊勢儻眾勿輕與戰或武昌無警卽於岳州以北水路要地駐防○諭兵部安慶爲江南上游要地令江甯將軍額楚鎮海將軍王之鼎各遣副都統一員領兵千名由水陸分路先往安慶防守將軍尼雅翰將所領之兵及馬哈達之兵共選六百名速抵安慶總統諸師○諭副都統馬哈達將軍尼雅翰至兗州選兵去後爾將所餘官兵分領其半隨往江甯與將軍

額楚同守其餘官兵留與參領噶篤渾沙納哈駐防兗州○戊子先是諭副將軍胡禮布署前鋒統領穆占爾等率領前鋒護軍兼程疾赴西安或軍中馬有疲乏者卽取西安綠旗官兵馬匹馳行儻更不足取滿洲官兵馬匹卽以爾等所留馬補給之可追及將軍瓦爾喀繼進四川與瓦爾喀合兵之後何處設防何處駐紮爾等相機區畫如有可進雲南之機必俟將軍赫業定議以行至是四川巡撫羅森奏蜀省軍心頗懷攜貳上命胡禮布穆占輕騎速進四川並諭赫業瓦爾喀佛尼勒等大兵進川之後一切宜加意慎密勿得玩忽其軍中行止當謹嚴斥堠勿墮詭計又諭總督哈占秦中綠旗官兵當拊循得宜更加鼓勵保障地方○諭兵部刑部近因逆匪楊起隆詐稱朱三煽惑民潛謀不軌其黨相繼緝獲俱經審明重者正法其牽累者業行省釋除首逆楊起隆張

子房金玉環鄭得勝仍嚴緝外其餘黨與槩從寬免緝以後著改行從善恪遵法紀勿得自干憲典軍民人等俱宜各安生業不得聽信謠言自生疑懼旁人亦不許妄行首告借端嚇詐擾害善良爾二部卽出示通行曉諭○己丑諭兵部湖南鄖陽地介二省中多曠土山谷扼塞姦民易於嘯聚恐有竊伏其間與賊應合者且慮逆賊或乘間侵犯其令副都統佟國瑤爲提督總兵官駐防彈壓○四川巡撫羅森提督鄭蛟麟總兵官譚宏吳之茂等以四川叛降賊聲言將分路寇漢中下夔州命彝陵總兵官徐治都自常德仍回彝陵防守○庚寅封世祖章皇帝子隆禧爲和碩純親王○命都統席卜臣爲鎮西將軍與副都統巴喀德業立同往保守西安接應進川大兵○增江西河南提督各一○辛卯兵部奏口外蒙古逃人在外娶妻若照舊例將其妻仍給還民與夫拆散

似屬可憫嗣後應免其離異仍給與爲妻從之○壬辰命駐防西安副都統擴爾坤帥師赴漢中漢軍副都統吳國楨領兵繼之○諭西安將軍瓦爾喀副都統佛尼勒爾等久歷戎行素稱諳練朕可無西顧之憂但大兵至蜀或綠旗已叛官兵或吳逆僞屬官兵有來降附者隨宜撫納仍應密爲防閑其嚴設巡哨整飭營壘爾等自能周知無庸再諭兵部郎中託必泰前奉使往蜀今鄭蛟麟旣叛度必羈留不還爾等或令人持書往諭大略言爾雖反叛朝廷猶念爾係從前效力之臣一時出於迫脅固不可知爾在京子孫家產並未按法收繫可將託必泰速行遣還否則大師壓境克復城池雖悔莫及矣至綠旗已叛官兵爾等相機招撫便宜行之

○是月免江南清河縣淮安衛河南輝縣水災額賦

二月乙未朔諭講官喇沙里前 太皇太后聞朕賞賜出征官兵

銀兩蒙 慈諭云出征官兵從來有賞賜之例遂出宮中撙節銀兩分賞今朕又念駐防官兵雖無賞賜之例但軍行期迫恐措辦艱難特加恩賞又蒙 太皇太后慈諭此番兵丁亦著將我宮中段匹銀兩賞給此 太皇太后德意爾等職司記注故爾諭知○
諭吏部兵部逆賊吳三桂虛聲恫喝以致巡撫盧震棄地潛逃已行拏究湖南文武各官仍能保乂百姓固守地方允稱盡職事平之日從優加恩可傳諭長沙諸處文武各官知之○以韓世琦爲偏沅巡撫原任江甯巡撫○丁酉欽天監奏欽造儀象告成進呈新製靈臺儀象誌 上留覽加南懷仁太常寺卿銜仍治理麻法○戊戌發山東倉穀賑濟南府饑○諭兵部陝西提督王輔臣久歷戎行勞績素著近舉首反賊吳三桂所送逆札遞子奏聞堅守臣節益見忠貞朕心深爲嘉悅前已有旨事平之日從優議敘今應卽行

加恩以彭激勸隨授王輔臣三等精奇尼哈番子王繼貞大理寺少卿○庚子以佟國楨爲江西布政使

由安徽察使遷

○湖廣總督蔡

毓榮奏正月二十四日前鋒統領碩岱兵抵荊州○癸卯命四川

省另設總督巡撫各一○甲辰以四川布政使金雋爲太常寺卿

○鎮西將軍席卜臣帥師之西安○乙巳湖廣總督蔡毓榮奏本

月初一日護軍統領伊爾度齊兵初二日護軍統領額司泰兵抵

荊州○丁未以周有德爲四川總督

原任兩廣總督

張得地爲四川巡撫

原任○湖廣總督蔡毓榮奏吳逆僞總兵楊寶應犯常德其父原任

廣東提督楊遇明家於常德爲內應知府翁應兆從逆常德潰

上諭前往安慶將軍尼雅翰於所領兵內簡選壯騎並前調江甯

京口副都統二員兵二千名赴武昌長沙等處與都統朱滿會商

而行兵馬各自統轄尼雅翰仍帶將軍印餘兵令副都統席布領

之駐安慶待護軍到日牧養馬匹其京口副都統所領船隻令尼雅翰酌量帶往武昌席布所領護軍驍騎亦量留與船隻○兵部議覆安南國王嗣黎維綱奏請臣屬莫元清查康熙七年諭黎維禱退還莫元清高平取有復相和好印結今黎維綱雖言收得誓書實蹟並祭文但此文年久而誓詞係莫敬耀之名此文或得自莫敬耀存時或收自莫元清今日奏內未經聲明難以懸擬應仍敕安南國王嗣黎維綱查明具題再議從之○戊申以崔岱爲湖廣布政使原任福建布政使○己酉湖廣總督蔡毓榮奏本月初六日都統覺羅巴爾布兵抵荊州○壬子湖廣總督蔡毓榮奏本月初八日吳三桂兵至澧州城守官兵以城叛應賊提督桑峨總兵官周邦南自常德還至澧州城外孤軍不能迎敵不得不退回荊州乞大兵星馳勦禦○癸丑上御經筵○甲寅湖廣總督蔡毓榮奏

長沙副將黃正卿參將陳武衡以城叛降賊

上諭大將軍順承

郡王勒爾錦都統覺羅巴爾布護軍統領伊爾度齊額司泰等曰
兵抵荊州是時常德澧州尙未有變理應稍休馬力速赴常澧以
戢兵民乃遲久不前以致常澧相繼皆陷今長沙亦有變可俟都
統鄂內等兵至荊州令其鎮守荆彝諸處卽令都統巴爾布等進
兵攻取常澧又襄陽爲我師來往之衝蜀寇必窺之地王軍前漢
軍都統副都統可酌率官兵留鎮襄陽又諭勒爾錦近聞常德已
叛四川夔州所在賊氛甚熾都統巴爾布兵力雖盛儻須兩路堵
剿更宜增兵王可於所率驍騎內揀選肥馬每佐領撥二三名每
翼以副都統一員領之速赴荊州巴爾布軍前若不得肥馬難於
前進聽王酌量以行○乙卯增雲南中左右三路貴州四川左右
各二路隨征總兵○己未大將軍順承郡王勒爾錦奏常德已陷

賊兵自蜀道直抵巴東臣恐襄陽危急隨令都統鄂內並每翼兩副都統率領官兵馳赴防守及接上諭卽令都統鄂內速至襄陽偵探鄖陽一路情形如鄖陽無警卽令兩副都統率每佐領驍騎二名徑往荊州都統巴爾布軍前得旨襄陽總兵官楊來嘉向自海上投誠其才甚庸所屬官兵率皆藐玩將來恐有他故可將漢軍官兵留鎮襄陽卽以此意密諭之但不必防閑過甚恐致洩漏以速其變○湖廣總督蔡毓榮奏本月十五日都統覺羅朱滿兵抵武昌○庚申諭大將軍等嚴禁軍士侵擾百姓○命都統覺羅朱滿馳守岳州○辛酉子故一等公遏必隆祭葬謚恪僖○諭吏部兵部陝西邊陲要地西控番回南通巴蜀幅員遼闊素號屢疆茲逆賊吳三桂煽亂滇黔四川從逆秦省地處鄰封恐有奸徒搖惑以致人心不寧雖有督撫提鎮等官各盡乃職但軍務繁重

必須專遣大臣假以便宜相機行事方可綏靖中外保固邊疆刑
部尙書莫洛前任秦督深得軍民之心諳曉地方情形茲特授爲
經略率領滿兵駐紮西安府會同將軍總督而行巡撫提督以下
悉聽節制兵馬糧餉悉聽調發一切應行事宜不從中制文武各
官聽便選用吏兵二部不得掣肘鄰省用兵當應援者酌量策應
如有軍機將軍總督領兵而行俟湖廣四川地方底定卽命還朝
應兼職銜及應給敕印爾二部會同速議具奏尋允部議加莫洛
武英殿大學士仍以刑部尙書管兵部尙書事兼都察院右副都
御史賜之敕印經略陝西○廣東廣西總督金光祖奏廣西將軍
孫延齡反殺都統王永年副都統孟一茂等執廣西巡撫馬雄鎮
○諭戶部蜀地人民稀少大兵所至艱於供億陝西與四川接壤
餽運爲便令陝西總督巡撫與四川總督協理供應○癸亥諭兵

部江西一省東接福建南界廣東西通湖廣爲三省要地令前往兗州副都統根特巴圖魯前往安慶副都統席布率兵速赴江西省城原駐江南副都統馬哈達將自京所帶甲兵移駐安慶其察哈爾左右兩翼官兵於兗州秣馬之後左翼官兵赴江南聽將軍統轄右翼官兵赴安慶聽馬哈達統轄

三月乙丑朔命諸路設筆帖式馳遞軍情○丁卯命左都御史多諾兵部侍郎納布內閣學士李仙根往荊州督理糧餉○庚午命和碩額駙華善爲安南將軍帥師鎮守京口副都統馬思文楊鳳翔內閣學士薩海同往○甘肅提督張勇舉首逆黨吳之茂逆書並執來使上嘉之命從優議敘○壬申諭大將軍順承郡王勒爾錦等朕覽都統覺羅巴爾布護軍統領伊爾度齊額司泰前鋒統領碩岱等奏皆云以八月進兵恢復疆土朕思雲貴尚未可輕

進必俟四川全定方圖進取但湖南地界南連嶼右東抵江西近據報長沙副將已降賊兵船盡爲賊有今惟當相機速取常德以斷長沙後路使賊彼此不及應援更以將軍尼雅翰都統朱滿等統兵進逼長沙則長沙之賊非來降卽棄城遁矣如此則賊膽自消百姓早得歸耕於我進取雲貴之師大有裨益若不急取使賊勢漸增妨民稼穡我兵深入芻糧轉運區處倍難朕據理揆度如此兵在千里之外豈能遙爲一一指示但民心業已搖動廣西音信又隔儻江西更有賊警勢必遣發禁旅不惟饋餉浩繁且恐兵民之心又生叵測爾等前出師時皆言進取雲貴之期不過八月今賊猶未至而已叛之長澧常德諸處乃亦欲待至八月設各處再有變者王將分兵以討否平分之則兵單以次勦取則馬疲今惟先取常德長沙以塞賊膽方爲制勝王宜集眾議以行又諭比

聞逆賊吳三桂身至常德王所統兵馬稍加休息進取常澧之時
狡寇知不能敵或出全力冒死以犯岳州武昌亦未可料王若進
兵當密示將軍尼雅翰都統朱滿各於所嚮之地酌期遠近約其
共舉庶幾萬全其荊州武昌兩地軍機互相關白務宜回顧武昌
王等仍相機以行○予故原任禮部尙書祁徹白祭葬○庚辰杭
州將軍圖喇奏耿精忠據福建反總督范承謨罵賊不屈賊幽之
巡撫劉秉政降賊○甲申諭吏部大兵進剿逆賊指日蕩平地方
恢復之後卽應設官撫綏民生料理事務頃以需人甚急已將漢
軍內堪用人員照該督撫所請發往軍前候用其漢人中素有清
操及才能堪任煩劇者不拘資格著漢官大學士以下三品堂官
以上據實保舉發往軍前與漢軍官員一體並用務期虛公推薦
有裨地方以副朕廣攬人才之意○江西巡撫董衛國奏長沙張

夏二賊欲犯江西袁州吉安地方緊要請撥兵防禦得旨著副都統根特巴圖魯率見駐南昌官兵前往相機勦禦提督趙國祚率官兵駐防南昌○乙酉以崔澄爲江南按察使由陝西漢商道遷○大將

軍順承郡王勒爾錦奏僞將軍劉之復陶繼智等率賊萬餘駕船七百偪犯彝陵於江兩岸各紮五營臣遣護軍統領額司泰等統領滿漢官兵前往剿禦三月初四日我軍分布水陸奮擊賊眾大敗遁回宜都下部議敘○壬辰湖廣總督蔡毓榮奏襄陽總兵官楊來嘉據穀城叛○命內大臣希爾根爲定南將軍禮部尙書哈爾哈齊副之帥師赴江西討耿精忠護軍統領桑遏吏部侍郎覺羅舒恕副都統根特巴圖魯席布參贊軍務又以武昌有警命都統覺羅巴爾布護軍統領伊爾度齊率師速赴武昌○定綠旗兵賞格○甲午命副都統李林隆率漢軍官兵赴襄陽同都統范達

禮協守令范達禮總統如鄖陽等處有警范達禮卽酌量應援○
西安將軍瓦爾喀奏吳逆下葉總兵竊踞陽平關本月十八日臣
同署前鋒統領穆占等率官兵進剿自野狐嶺直抵陽平擒斬賊
衆三千有餘復取陽平關得旨嘉獎下部議敘

夏四月丙申鎮南將軍尼雅翰奏奉使雲南禮部侍郎折爾肯翰
林院學士傅達禮還至武昌攜有吳三桂奏章諭大將軍順承郡
王勒爾錦等朕思吳三桂素多狡詐此中疑有詭計如吳三桂服
罪請降王及將軍等仍議招致之益加儆備毋墮奸謀卽吳三桂
東身歸命王等但以禮受降其官屬當益加嚴防不可分散兵力
急於前進務相機以行○丁酉鄖陽提督佟國瑤奏三月十九日
鄖陽副將洪福以所部兵千餘名反攻臣衙門臣率標下官兵三
百餘名奮勇衝殺賊退復來自本日至二十日共十餘陣斬賊二

百餘級賊遁去倉庫衙署皆得保全得旨嘉獎下部議敘○戊戌
吏部兵部奏湖廣總督蔡毓榮聞吳三桂反叛不能安民心固疆
圉又不令提督桑額往守常德致常澧長岳相繼陷賊應革職雲
南貴州總督鄂善旣奉命與蔡毓榮公議軍機地方失守罪亦難
逭應降五級調用得旨蔡毓榮革職鄂善降五級俱留任戴罪圖
功○諭議政王大臣等頃安塘筆帖式向侍衛觀寶言河北總兵
官蔡祿潛通叛鎮楊來嘉令兵丁借稱捕魚披甲行走有叛狀民
心驚疑著內大臣阿密達帶每佐領護軍一名每旗護軍參領一
員速赴懷慶察問○辛丑以陳洪明爲戶部右侍郎由大理寺卿遷○子
故原任吏部尚書馬希納祭葬○癸卯命隨征貴州左路總兵官
馬雲程右路總兵官高登科往襄陽防守○甲辰諭議政王大臣
等兗州駐防官兵旣調往江西今授都統喇哈達爲鎮東將軍同

副都統伯穆赫林甘度海率滿洲蒙古每佐領驍騎一名及所調喀喇沁土默特兵二千駐防兗州穆赫林甘度海參贊軍務○先是平南王尙可喜奏孫延齡僞檄有三藩之語閩省又候告變臣與耿精忠本係姻姪不能不踧踖於中竊臣叨王爵年已七十有餘雖至愚極陋豈肯向逆賊求功名富貴乎惟知捐軀矢志極力保固嶺南以表臣始終之誠得旨王累朝勳舊性篤忠貞朕心久已洞悉近復屢據猷略保固疆廝厥功甚茂覽奏披瀝悃忱深爲可嘉著益殫心料理相機勦禦以副朕倚任之意至是復諭兵部平南王尙可喜奏請調遣官兵保固疆圉忠誠顯著深爲可嘉兩廣一應軍機調遣及固守地方事宜著尙可喜與總督金光祖同心合力務酌萬全而行○先是偏沅巡撫盧震棄長沙奔回上遣部員往逮之至是至京法司讞奏盧震爲封疆大臣乃於長沙

未變之先委地潛逃應論絞得旨盧震著監候秋後處決○乙巳
平南王尙可喜奏臣眾子中惟次子都統尙之孝律己端慎馭下
寬厚可繼臣職至於軍機事宜臣雖衰老尙能指揮調度斷不至
有誤封疆得旨尙之孝襲平南王○丁未諭兵部刑部逆賊吳三
桂值明季闖賊之變委身從賊尋以父死賊手窮竄來歸 世祖
章皇帝念其投誠優封王爵授之軍旅委以事權異數殊恩振古
未有爰及朕躬特進親王倚任等於腹心恩禮加於勳舊方期其
感恩圖報殫極忠忱詎意吳三桂以梟獍之資懷狙詐之計陰圖
不軌自啓釁端藉請搬移輒行叛逆煽惑奸宄荼毒生靈極惡窮
凶神人共憤已經遣發大兵進剿剋期蕩平諸王大臣會議反逆
子孫理應誅戮以彰國法再三奏請朕尙冀其悔禍自新束身待
罪未忍加誅近覽吳三桂奏章詞語乖戾妄行乞請諸王大臣咸

以吳三桂怙惡不悛其子孫卽宜棄市義難寬緩朕思亂臣賊子
孽由自作刑章具在眾論僉同朕亦不得而曲貸之也本當照廷
議將吳應熊吳世霖併其餘子俱行凌遲處死但以吳應熊久在
近侍朕心不忍故將吳應熊及其子吳世霖處絞其餘幼子俱免
死入官應坐人犯分別正法所有干連人等情罪稍可矜原者敕
所司概行省釋以昭法外之仁爾二部卽通行曉諭內外軍民人
等俾咸悉朕意○先是諭江甯將軍額楚總督阿席熙閩中告變
兩浙需兵如杭州將軍調爾滿兵時可令副都統一員馬兵千名
水陸往援爾等當豫備以俟爾兵若行可調安慶察哈爾兵鎮守
江甯又諭杭州將軍圖喇總督李之芳提督塞白理等耿精忠反
叛爾等率滿漢官兵作何防禦固守當相機而行朕已敕駐防江
甯滿兵豫備若需用滿兵可於江甯調取至是福建告急 上命

副都統胡圖率江甯滿兵副都統馬哈達率所部官兵及江甯左翼察哈爾官兵速赴杭州同將軍圖喇等商酌行事安南將軍華善於所部漢軍內擇馬肥者五百名令夸蘭大二員領之亦速赴杭州聽圖喇等調遣移安慶右翼察哈爾官兵守江甯華善仍令速赴京口○諭兵部逆賊孫延齡原係定南王下末弁之子本無才能功績祇緣定南王孔有德航海歸誠出師盡節世祖章皇帝憫其忠貞茂著官兵人等不忍分離收合散亡俾爲一旅仍以所屬官員統之養贍加恩槩從優厚追朕御極念孫延齡旣配王女理應量加寵榮故授爲將軍使之管理定南王所遺官兵鎮守粵西在孫延齡叨冒崇階自應恪恭職掌殫忠報效乃歷任以來屢有過犯及累經王永年等訐奏賊罪部議從重處分朕猶以定南王之功曲加貸宥仍令管兵如故近復賜以撫蠻將軍印委任

有加恩寵罔替不意孫延齡包藏禍心背恩忘義結連逆賊吳三桂輒行反叛煽亂地方國法難容宜加顯戮今削其將軍職銜大兵指日進剿立正典刑但念其所管官兵係定南王舊人受恩累朝忠義素著必不甘心從逆嘗棄前勳其所管人員及地方官兵有能擒斬孫延齡投獻軍前者優加爵賞或以兵馬城池納款者論功敘錄或力有不逮能自拔來歸者亦免罪收用至於伊等父兄子弟見在京城直隸各省者槩不株連毋得心懷疑畏自罹法網負朕好生之意爾部卽速行偏諭○平南王尙可喜奏逆賊吳三桂遣人與臣逆書臣擒執來人併書奏聞得旨嘉獎下部俟事平日優敘○己酉諭議政王大臣等江甯滿兵旣撥千人援浙恐江甯兵單可撥包衣佐領兵千名八旗每佐領驍騎二名往守江甯以駐守懷慶內大臣阿密達爲總統在京副都統喇哈紀爾他

布爲兩翼領之尋授阿密達爲揚威將軍○庚戌諭議政王大臣等耿精忠背恩反叛耿昭忠耿聚忠雖與吳應熊不同但係彼親弟國法亦難寬縱著並禁於一室其屬下官員俱著閒住議政王大臣等又請並禁其諸兄弟從之○皇子生卽於是日薨未命名○辛亥諭議政王大臣等副都統馬哈達胡圖部下兵及將軍華善所分遣兵以都統賴塔爲平南將軍統之赴杭州勦禦馬哈達胡圖並同參贊其杭州駐防官兵仍聽將軍圖喇統轄一切勦守事宜賴塔圖喇商酌以行○癸丑大將軍順承郡王勒爾錦奏四月初八日逆賊僞將軍陶繼智等自宜都縣以三百艘來犯轟陵都統鄂內等率兵進擊斬賊甚多獲船六十餘隻下部議敘○甲寅諭兵部逆賊吳三桂反叛所在鎮守地方文武各官因兵單力微不能拒敵欲棄城來奔又懼國法難逭迫於不得已而附從

者有之或爲奸計訛言搖惑無知而附從者有之今大兵齊集剋期剿滅務盡根株朕念附從之徒皆朕赤子一時迷惑情非得已恐大兵進剿槩行誅戮朕心實爲不忍有能自悔前罪或獻城池或率兵卒或斬逆賊頭目獻其首級者俱行免罪給以原官仍論功議敘若愚頑武弁執迷不悟助惡不悛其部下之士有心懷忠義或擒斬逆渠或約獻城池或率領黨類來投俱從優議敘授官給賞爾部通行曉諭○戊午內大臣阿密達領兵至懷慶擒蔡祿以聞上手敕諭之曰爾行未踰旬克濟厥事以遏亂萌朕心深爲嘉悅但人命關繫重大須研審得實方可正法毋得株連無辜至所俘人口散給士卒宜重賞被傷者以示鼓勵尋阿密達訊鞫得其謀叛實蹟奏聞上命將蔡祿父子並同謀者俱行正法又諭兵部刑部蔡祿係海上投誠之人念其來歸給之世爵復優擢

河南河北總兵官正宜殲竭忠忱力圖報效乃潛蓄逆謀欲應吳逆治甲練兵約期煽亂經坐塘筆帖式密報遣內大臣阿密達前往察勘並不出迎及入城至伊署輒敢施放火礮拒敵因其叛形顯著俱已收執奏請正法朕恐有冤誣復令詳加審鞫據其兵丁家人口供俱稱蔡祿造鳥槍購廄馬與楊來嘉往來同謀約應吳逆謀反情實卽將蔡祿父子並其姪蔡鼎席及同謀人等俱行正法其餘投誠墾荒弁兵事無干涉者槩不株連叛逆法所必誅良善務加綏輯國有成憲軍民無得驚疑爾二部卽通行曉諭俾咸悉朕意○諭兵部耿精忠叛海澄公黃梧提督王進功隔越漳泉與浙江聲問不通著平南王兩廣總督廣東江西巡撫浙江將軍總督等設法遣人確探消息若黃梧王進功等能各守地方令其固守儻力單不能自守廣東江西何處可通著來會合○平南王

尚可喜奏吳三桂遣賊兵二萬屯黃沙河若與孫延齡合兵一處勢益猖獗請就近撥兵同臣兵剿滅孫逆 上諭副都統根特巴圖魯席布等候將軍希爾根哈爾哈齊等兵至江西卽率所部官兵急赴廣東一切機宜同平南王尚可喜參酌以行尋授根特巴圖魯爲平寇將軍○辛酉諭兵部逆賊耿精忠庸懦無能癡愚寡識祇緣伊祖耿仲明航海來歸 太宗文皇帝念其投誠之功特封王爵寵眷優隆 世祖章皇帝定鼎燕京復加委任令其統兵鎮粵中道殞身其子耿繼茂叨恩承襲兩鎮疆恪共職守朕惓懷勤裔恩禮有加及其病亡尤深軫卹特遺部臣頒賜敕諭俾耿精忠襲封王爵自伊祖以及伊身受恩三世四十餘年在耿精忠賴祖父之餘勳冒朝廷之崇秩自宜感恩圖報殫竭忠忱不意其包藏禍心潛謀不軌乘吳逆之變輒行反叛煽亂地方罪惡昭彰

國法難宥今削其王爵遣發大兵進剿指日蕩平但念其所屬官兵及地方官員軍民人等或被逆賊迫脅雖懷忠義莫能自明恐大兵一到玉石難分有能擒斬耿精忠投獻軍前者優加爵賞或以兵馬城池納款者論功敘錄或力有不逮自拔來歸者亦免罪收用其原係所屬之人見爲直隸各省文武官員者槩從寬宥雖有父子兄弟見在福建者亦不株連勿得心懷疑畏自罹法網負朕好生之意爾部卽速通行曉諭○癸亥平南王尙可喜奏請調發官兵征剿逆賊及長江宣設舟師備禦 上命兵部以分遣禁旅諸路調度情形移會尙可喜曰今南靖寇大將軍順承郡王及貝勒等帥領大兵由常澧進平雲貴鎮南將軍尼雅翰都統朱滿巴爾布等帥師由武昌水陸進取岳州長沙直入廣西都統宜理布等帥師駐鎮彝陵都統范達禮副都統德業立等帥師駐鎮

鄭襄安西將軍赫業副將軍胡禮布西安將軍瓦爾喀等帥師由漢中進取四川副都統擴爾坤吳國楨等帥師駐防漢中鎮西將軍席卜臣等帥師駐防西安復遣尙書莫洛經略陝西等處帥大兵居中調度鎮東將軍喇哈達等帥師於山東河南江南要地駐防安南將軍華善等帥滿洲漢軍官兵同鎮海將軍王之鼎等於京口水陸駐防揚威將軍阿密達等帥師同江甯將軍額楚等防守江南安慶沿江險要平南將軍賴塔帥師由浙江平定福建浙江將軍圖喇帥師駐鎮杭州兼防海疆定南將軍希爾根副將軍哈爾哈齊等亦帥師由江西建昌廣信平定福建平寇將軍根特巴圖魯席布等帥師赴廣東會同該藩進剿一切機宜參酌以行五月丙寅 皇子允礪生○申時 皇后崩於坤甯宮 上輟朝五日諸王以下文武官員及公主王妃以下八旗二品命婦以上

俱齊集舉哀持服二十七日以軍興免直隸各省文武官齊集舉
哀制服及遣官進香○丁卯敘舉首林興珠逆書功加墾荒都督
蔡璋太子少保事平之日以總兵官用加南贛總兵官劉進寶左
都督事平之日以提督用○江西巡撫董衛國丁父憂命在任守
制○戊辰奉移大行皇后梓宮至西華門外享殿上親臨送
○辛未諭禮部皇后何舍里氏作配朕躬已經十載上事太皇
太后皇太后克盡誠孝佐朕內治尤極敬勤節儉居身寬仁逮
下宮闈式化淑德彰聞茲於康熙十三年五月初三日崩逝惓懷
懿範痛悼彌深宜有稱謚以垂永久著內閣翰林院會同擬奏應
行典禮爾部詳察以聞○平南王尚可喜奏孫延齡叛自稱安遠
大將軍移牒平樂梧州諸府伏候廟謨指授協力蕩剿上命尚
可喜與總督金光祖提督馬雄等會同商酌孫逆有可勦之勢卽

議進剿若未可速進則俟大兵協力翦滅又命部臣傳諭馬雄固
守所屬相機滅賊儻賊盛難禦卽率官兵赴廣東與平南王總督
等協守以俟大兵之至○戊寅安西將軍都統赫業等奏臣等率
領大兵自漢中府起程四月二十八日抵七盤關參贊軍務署前
鋒統領穆占等大破賊眾於關口又敗之於種子鋪山下五月初
五日進抵朝天關護軍參領杭奇領纛先登大兵繼進力攻三日
敗僞總兵石存禮等於繁閣鋪山下陣斬吳逆親軍守備一員賊
兵七千餘生擒從逆守備王道成追殺十餘里遂克朝天關得旨
嘉獎下部議敘○諭經略莫洛朕聞鄭蛟麟來降又聞克復朝天
關喜慰殊甚此皆諸將軍謀略頃者賊眾擁聚岳州霪雨連綿大
兵不宜直前俟雨霽風順卽水陸並進吳三桂果在澧州乘虛徑
襲其後乃今日至要之機如克復四川可疾由交水以取貴州或

徑取雲南其可否機宜爾與諸將酌議密奏○辛巳浙江總督李之芳奏開化縣知縣崔華率領鄉勇殺敗賊眾恢復縣城得旨嘉獎下部議敘○壬午杭州將軍圖喇奏平陽兵變總兵官蔡朝佐被執浙江總督李之芳等奏報逆賊曾養性至平陽與叛將司定猷等會兵圍瑞安衢州一路賊兵屯聚清湖海上賊蹤出沒內地山寇復起見在標兵四應不給乞調近省禁旅彈壓上諭將軍賴塔旣抵杭州可與將軍圖喇總督李之芳提督塞白理等會商平陽衢州等處緩急機宜猶恐勢分力薄其以駐紮江甯將軍阿密達所轄包衣佐領官兵令副都統喇哈領赴浙江聽賴塔調度又以駐紮兗州將軍喇哈達所轄喀喇沁土默特兵千名令副都統穆赫林領赴江甯聽阿密達管轄○甲申初祭 大行皇后 上親臨舉哀是日 上除服○乙酉繹祭 大行皇后 上親臨

舉哀○平南王尙可喜奏潮州總兵官劉進忠暗通耿逆於四月二十日擁兵叛與續順公沈瑞兵巷戰二十三日遂引閩寇入潮州城○丙戌以王功成爲江南按察使由驛鹽道遷

○己丑諭兵部平

南王尙可喜累朝勳舊久鎮疆勞績茂著自吳逆叛後尤能篤

守忠貞殫心籌畫屢抒謀略保固疆圉事平之日從優議敘已經有旨其藩下官兵及該省文武官兵俱能協力同心克效忠順防

禦逆賊勞瘁行間朕心時切軫念事平之日俱著一併從優敘賚

爾部卽速行傳諭俾咸悉朕意○庚寅奉移

○大行皇后梓宮權

厝於都城北鞏華城

○上親臨送是日還宮○壬辰

○上至鞏華

城大祭

○大行皇后

○轉史大成爲禮部左侍郎以楊正中爲禮

部右侍郎

由內閣學士遷

○諭平南王尙可喜總督金光祖提督馬雄等

逆賊孫延齡奏稱督提二臣誘其都統王永年謀爲不軌故不得

已翦除王永年此係潛通吳逆故飾辭誣奏耳然孫延齡雖叛其所部兵曾隨定南王效力國家豢養有年恐大兵到日槩行誅戮朕心有所不忍前有旨如孫延齡改過來降亦從寬宥爾等不可因此遂緩進勦機宜必孫延齡果悔罪歸誠爾等仍受降具奏其所屬弁兵感念國恩或殺孫延齡或率眾迎降從優議敘卽隻身自歸者亦收留恩養其出示曉諭

六月甲午朔諭兵部襄者耿精忠之祖耿仲明於太宗文皇帝時航海歸誠優錫王爵效力行間勞績茂著及其身故睿親王不令承襲世祖章皇帝追念舊勳特允其子耿繼茂令仍襲王爵兩鎮巖疆爲國藩屏爰及朕躬惓懷勲裔恩寵有加後覽其病終遺奏有地方兵民交敝賊寇未滅死不瞑目等語忠義肫篤深切軫念且因耿繼茂之子耿精忠自幼曾爲近侍予襲王爵仍鎮閩

省朕以耿精忠必能紹祖父遺訓殫竭忠誠無忝先烈乃不意近
爲逆賊吳三桂誘惑煽亂地方乘累世之忠貞構一旦之狂舉既
干國法復墮家聲朕猶念其祖父前功諒耿精忠必係一時無知
墮人狡計與吳三桂不同故將吳三桂子孫正法耿精忠諸弟在
京照舊寬容所屬官兵並未加罪今遣甯南靖寇大將軍多羅順
承郡王勒爾錦由湖南進剿雲貴吳逆指日授首鎮南將軍尼雅
翰統領大兵由廣西進剿雲貴四川遣安西將軍赫業及西安將
軍瓦爾喀等統領大兵已攻克七盤朝天等關直抵保甯克期底
定全川並勦雲貴定南將軍希爾根統領大兵由江西進剿福建
平南將軍賴塔由浙江進兵平寇將軍根特巴圖魯由廣東進剿
福建又遣揚威將軍阿密達鎮西將軍席卜臣安南將軍華善鎮
東將軍喇哈達等各統領大兵駐紮江南京口等處調度征剿耿

精忠殲滅在於旦夕但念其祖父宣力累朝洎精忠之身遽至覆亡宗祀斬絕朕心深爲不忍且吳三桂乃本身投誠之人背恩反叛自取誅戮耿精忠自祖父以來受恩三世四十餘年非素蓄逆謀首倡叛亂者比爾部卽傳諭耿精忠果能追念累朝恩德及伊父忠謹遺言革心悔禍投誠自歸將侵犯內地海賊速勦圖功卽赦免前罪視之如初朕以至誠待天下必不食言俾其善自審度勿負朕保全勳舊之意爾部卽遵諭速行於是兵部奏遣工部郎中周襄緒及耿精忠下一等護衛陳嘉猷齋敕赴福建尋又諭平南將軍賴塔浙江將軍圖喇總督李之芳巡撫田逢吉提督塞白理等耿精忠作逆蹂躪地方大干國法已遣發大兵於浙江江西廣東三路進剿但念其祖父曾宣力累朝洎耿精忠之身遽至覆亡宗祀斬絕朕心殊爲不忍因遣周襄緒陳嘉猷齋敕往諭如耿

精忠悔禍乞降赦免前罪仍恩遇如初爾等不可因此遂誤進勦
機宜必耿精忠果請罪輸誠爾等卽受降來奏若仍執迷肆逆不
悛其藩下官兵有心存忠義者或擒斬耿精忠或率眾來降俱優
加恩賞卽隻身自歸者亦收留撫恤○己亥贈湖廣陣亡遊擊甘
應龍爲參將予祭葬廕子弟一人以守備錄用○庚子命戶部右
侍郎達都赴浙江督理糧餉○諭兵部吳逆作叛以來湖南綠旗
官兵降賊者眾惟彝陵總兵標下官兵克篤忠貞堅守地方近復
兩戰彝陵奮勇擊賊勞績顯著若俟事平議敘則效力之士不得
早霑國恩可卽行敘賞以示鼓勵○癸卯江西巡撫董衡國奏叛
弁柯昇句連閩逆竊踞廣信諸處麻蓬地方賊兵繼起 上諭定
南將軍希爾根等爾等至江西時根特巴圖魯等可先定廣信護
軍統領查哈太原令進兵荊州令改赴江西爲希爾根參謀到日

希爾根於所領兵內每佐領撥驍騎三名付前鋒統領舒恕率領與根特巴圖魯合爲之參謀由袁州進取長沙夾勦逆賊根特巴圖魯等進取長沙日期須豫啓順承郡王知悉將軍喇哈達所統每佐領兵一名亦令副都統甘度海率往江西與希爾根兵合參其軍務○乙巳以徐元文爲內閣學士由祭酒遷○丙午諭議政王大臣等今逆賊吳三桂於澧岳諸處抗拒我師且用奸謀搖惑軍民之心分我兵勢宜增兵速行剿滅今八旗每佐領撥驍騎二名並派察哈爾護軍驍騎一半又蒙古四十九旗內與京師稍近者如科爾沁十旗敖漢一旗奈曼一旗克西克騰一旗歸化城十旗共出兵萬人以旗下兵之半及蒙古兵六千令固山貝子準達率往荊州散秩大臣多莫克圖爲署都統參贊準達軍務又以旗下兵之半及蒙古兵四千以多羅貝勒尙普爲安遠靖寇大將軍同固

山貝子章泰鎮國公蘭布率往岳州所調蒙古兵俱限八月初一
日以前至京擇蒙古貝勒以下領之尋理藩院以蒙古貝勒貝子
公台吉等列名奏請命科爾心輔國公圖納黑杜爾伯特台吉溫
布赴荊州巴林貝子溫春台吉格勒爾圖赴岳州○丁未副都統
德業立等奏五月二十九日叛將洪福等侵犯均州營於武當山
下臣率領官兵迎擊大敗賊眾下部議敘○庚戌浙江提督塞白
理奏總兵官祖宏勳以溫州叛 上諭駐江甯副都統紀爾他布
率右翼察哈爾全軍及每佐領甲兵一名赴浙江會同提督塞白
理守禦鎮東將軍喇哈達所轄蒙古兵悉令署副都統巴爾堪率
赴江甯聽將軍阿密達統轄松江乃海口要衝且與浙江連接阿
密達額楚等可密咨提督楊捷若以松江可虞卽酌遣滿洲蒙古
官兵以副都統一人領赴松江與提督協守在京滿洲蒙古每佐

領撥驍騎一名漢軍每佐領二名以精奇尼哈番碩塔一等侍衛
穆森爲署副都統偕漢軍都統釋迦保領之前赴兗州與將軍喇
哈達會議行事○江西巡撫董衛國奏耿逆遣賊卒連李太等出
犯建昌府彬關官兵奮勇衝殺斬獲甚多下部議敘○辛亥遣侍
衛二格往諭鎮南將軍尼雅翰等爾等咨兵部稱馬多羸弊積兩
弓輶朕慮此時進兵未便恐爾等以頓師日久懼罪夫以千里之
外軍勢曲折豈可逆料朕不欲速惟圖萬全爾等俱係大臣聽爾
等謀畫以行其軍中情形及俘獲賊兵言賊進止之狀並爾等所
見俱密行陳奏尋尼雅翰等奏六月十七日投誠僞守備薛麟兆
等言吳三桂遣僞護衛至岳州令賊將堅守且趣進兵賊將稱待
長沙造鳥機船到時水陸入犯又言賊營缺餉全賴長沙水陸運
送長沙守兵不多臣等議俟秋涼相機進取○浙江總督李之芳

奏江西廣信玉山永豐等處叛兵土寇句合閩賊僞總兵李雲龍率賊眾五千來犯常山開化金華副將牟大寅等奮擊之陣斬僞參將張雄殺賊五百餘級獲僞札器械無算下部議敘○壬子杭州將軍圖喇以病還京命喇哈達移鎮杭州掌將軍印務統領駐防兵馬及自京所遣漢軍官兵其鎮東將軍敕印留付護軍統領查哈太卽令管理兗州官兵其往江西兵令署副都統倭赫穆承格領赴將軍希爾根軍前諭喇哈達曰鎮守杭州將軍圖喇因病罷任今浙江當多事之秋杭州諸處殊爲要地以爾素有才能遣往暫理杭州將軍事務爾抵杭州可與副都統馬哈達雅塔理侍郎達都等會同商酌務期固守封疆愛養將士收拾軍民之心以副朕委任之意○先是命經略莫洛遣副都統擴爾坤進四川馬一寶赴漢中將軍席卜臣提督王輔臣俱赴荊州至是莫洛奏擴

爾坤官兵已遣赴廣元周有德軍前馬一寶官兵已遣赴漢軍副都統吳國正軍前席卜臣則令率每佐領護軍一名往漢中總統馬一寶吳國正等之兵以副都統巴喀率每佐領驍騎一名同提督王輔臣往荊州 上諭貝勒貝子等既率八旗及蒙古兵赴楚王輔臣兵不必發荊州或令王輔臣從將軍赫業等進取保甯或仍駐平涼聽莫洛酌遣巴喀卽率兵赴順承郡王軍前尋莫洛又奏逆賊固守保甯且廣元所屬百丈關諸處賊眾盤踞恐擴爾坤兵力單薄隨令副都統吳國正俟馬一寶兵至卽率官兵前赴廣元○癸丑廣西提督馬雄奏孫延齡逆眾不下萬五六千人臣雖堅守柳州眾寡不敵祈敕大兵速進應援 上諭兵部柳州乃廣西要地馬雄旣堅守請援速行平南王尙可喜總督金光祖酌發廣東兵前往接應如有機會可乘聽平南王與提督會商進剿○

乙卯以陳洪明爲廣西巡撫由戶部右侍郎遷○戊午杭州將軍圖喇

奏

杭州兵單請增兵協守命派撥京口將軍標下綠旗官兵三千江

南提標官兵二千調山東署提督事副都統段應舉帥赴杭州仍聽將軍喇哈達節制段應舉既赴浙江將軍賴塔可率所轄滿兵

及綠旗兵五千進平福建○諭兵部浙江四川兩路宜遣王貝勒

貝子公等前往剿賊所以遣王等者非謂諸將才能不足念諸王

貝勒皆朕懿親指揮調遣可無牽掣守禦征剿足增威重其授和

碩康親王傑書爲奉命大將軍同固山貝子傅喇塔率前鋒一百

七十六名每二佐領合出護軍一名赴浙江又前調赴荆岳蒙古

兵令各分一千名隨王至江甯時將此兵留駐更調駐守江甯喀

喇沁土默特兵併赴浙江授多羅貝勒董額爲定西大將軍同固

山貝子都統溫齊輔國公綽克託率貝子準達所領驍騎之半赴

四川其遣往王貝勒貝子公下包衣佐領多者甲士酌量披甲帶往至王貝勒所駐地方將軍在
衣佐領少者以閒丁酌量披甲帶往至王貝勒所駐地方將軍在
王軍前則將軍印不用如別將兵各用其將軍印○諭兵部貝勒
尚善等至岳州將軍尼雅翰都統朱滿巴爾布護軍統領額司泰
仍參贊軍務康親王傑書等至浙江將軍賴塔副都統喇哈紀爾
他布仍參贊軍務貝勒董額等至四川將軍赫業瓦爾喀護軍統
領胡禮布署前鋒統領穆占副都統佛尼勒仍參贊軍務其餘俱
罷參贊○庚申冊謚 大行皇后曰仁孝皇后○辛酉浙江提督
塞自理奏溫州屬羅清等營相繼降賊黃巖總兵官所屬太平營
亦叛賊兵離黃巖止七八十里請速發大兵保守沿海邊地 上
諭羅清等營既相繼降賊則台州甯波可慮副都統喇哈所率包
衣佐領兵且勿赴將軍賴塔軍前留駐杭州副都統紀爾他布及

喇哈之兵俱聽將軍喇哈達侍郎達都同議調遣保守台甯等處
俟段應舉兵到令其固守地方喇哈兵及副都統馬哈達兵仍會
賴塔相機以行康親王固山貝子至時賴塔喇哈達皆聽王等指
揮調度○河道總督王光裕奏山陽縣高家堰石工板工成

秋七月甲子以魏象樞爲戶部右侍郎

由大理寺卿遷

○廣東廣西總督

金光祖丁父憂命在任守制○丁卯轉廖旦爲工部左侍郎

以祁

通額爲工部右侍郎

原任盛京刑部侍郎

○增杭州每旗防禦各一○戊辰

議政王大臣等議覆廣東巡撫劉秉權奏平南王次子都統尚之

孝辭襲王爵今當諸逆鴟張大兵進剿之時平南王尚可喜籌畫

周詳精神強健應令尚可喜照舊管理俟事平令尚之孝承襲從

之○辛未以郎廷佐爲福建總督

原任江南江西總督

○壬申差往達賴喇

嘛處員外郎拉篤祜喇嘛丹巴德穆齊還奏云臣等奉命行至西

甯厄魯特墨爾根台吉攔阻云前達賴喇嘛往京時我班禪差人問達賴喇嘛安中國以爲額外遣使不令行走故我今亦攔阻臣等答云達賴喇嘛有此語乎明日決意前行次日起行前往墨爾根台吉亦無從攔阻至青海地方所住達賴綽爾濟遂遣鄉導送往至達賴喇嘛處達賴喇嘛俯伏接旨向臣等云我聞吳三桂反叛心甚憂悶今接敕書得聞 聖躬萬安不勝欣慰我本喇嘛惟當誦經祝佑 聖躬康豫威靈遠播國祚綿長吳三桂指日殄滅其揚打木結打木二城原係我三噶爾麻之地今爲吳三桂所奪我卽遣兵攻據若吳三桂勢窮而來我當執而送之若聞彼不出邊境東西逃竄卽時進兵擒拏臣等云喇嘛旣欲相助當勿吝大舉喇嘛云聞大國兵馬皆給糧草我兵前進糧草不繼人飢馬瘦何能深入臣等云當此吳三桂反叛之時若將國家山陝良民搶

奪非爲相助反生釁也達賴喇嘛云我亦當誠諭我兵不令妄行
天使回奏 皇上作何調遣卽諭來使令其速歸我卽遵旨奉行
奏畢 上曰拉篤祜等所行殊爲可嘉著吏部議敘丹巴德穆齊
著賜名加賞○癸酉命鎮海將軍王之胤撥崇明沙船率綠旗兵
習水戰於黃浦以防海寇○經略莫洛奏大兵在保甯與賊相持
恐運餉日久秦民必致疲苦臣親赴漢中酌量分路進發貝勒董
額等若率眾盡行慮致遲滯請敕貝勒董額以所將驍騎併入康
親王軍內率所部輕騎赴西安旋進四川 上諭董額部下無多
所將驍騎旣入康親王軍內輕騎入川兵力單薄可令貝子公亦
各率所將輕騎併力前進○平南王尙可喜奏逆鎮劉進忠遣逆
黨陳奐率眾分踞程鄉縣水陸要口抗拒我師提督嚴自明等分
遣官兵擊之斬獲甚眾程鄉縣僞守備張奉寰遣人通款縛獻僞

守備楊滄開門迎降得旨嘉獎下部議敘○平南將軍賴塔奏逆賊犯金華府副都統馬哈達雅塔理等親督官兵擊敗賊眾下部議敘○江西巡撫董衛國奏南瑞總兵官楊富隱匿在官甲冑私置竹礮器械暗招閩兵千餘練習滾牌與賊潛通謀爲內應臣與定南將軍希爾根等密計擒之卽時正法下部議敘○甲戌多羅郡王孟峩薨 上輶朝二日予祭二次造墳立碑謚曰良○乙亥先是江西巡撫董衛國奏閩賊出犯杉關新城失守至是又奏報賊攻破石城聲犯甯都 上諭贛州乃入粵孔道將軍希爾根巡撫董衛國等務會同商酌固守之策並趣副都統甘度海署副都統公倭赫等速赴江西○丙子浙江總督李之芳奏賊兵合力來犯衢州臣標兵單可虞請敕副都統喇哈統兵急進以壯聲援上諭喇哈兵不必留駐杭州速赴衢州與將軍賴塔併力勦禦將

軍喇哈達侍郎達都副都統馬哈達雅塔理等仍駐杭州防守副都統紀爾他布之兵視何處警急卽往應援○戊寅廣東廣西總督金光祖奏交趾知孫延齡叛逆乘機蠢動陳兵邊界其情叵測請加防禦上敕平南王及總督提督等嚴飭兵將不時偵察仍增官兵防守險隘○庚辰設江西總督以董衛國爲之

由江西巡撫遷

辛巳浙江巡撫田逢吉奏嘉興湖州二府土賊猖獗臣發標下官兵驛傳道李之粹統領會同二府文武各官往剿大敗賊於湖州白鶴嶺生擒賊首朱二鬍子羊子加等一百餘名餘賊陸續擒撫地方安甯下部議敘○壬午先是上命副都統蘇朗署副都統額思赫率領蒙古兵二千之江甯卽留副將軍阿密達令之駐防其原駐江甯喀喇沁土默特兵令蘇朗等率赴浙江至是浙江賊寇蜂起衢州告警將軍喇哈達奏聞上以衢州正在危急令副

都統伯穆赫林率喀喇沁土默特兵自江甯速赴浙江與將軍喇哈達等會同勦禦副都統蘇明等仍率蒙古兵鎮守江甯將軍喇哈達賴塔侍郎達都總督李之芳旣同任勦撫之事一應軍務須公同商酌毋分彼此如浙江何處有警卽相機應援○廣東廣西總督金光祖奏梧州失陷我兵據守梧江 上諭將軍根特巴圖魯等兵由袁州取長沙進廣西以襲賊後則取道廣東必致遲久可令平南王尙可喜總督金光祖提督馬雄會同酌議添發官兵規取梧州否則固守梧江諸處相機勦禦○西安將軍瓦爾喀等奏進征四川總兵官王懷忠標兵因餉匱逃散今欲勦賊兵力單薄運餉不至乞發兵救援 上諭康親王傑書及貝子準達所部驍騎俱令貝勒董額率之以行其大兵或仍據壕塹圍守保甯或因糧運艱難暫還廣元令經略莫洛將軍瓦爾喀等公同商酌王

懷忠標下逃兵姑寬其罪應如何撫納亦令莫洛商酌速行○癸未以楊熙爲福建巡撫

原任山西巡撫

原任倉場侍郎

駐紮

贛州○將軍圖喇都統喇哈達奏僞總兵閻標率賊萬餘自溫州

處州來犯金華副都統鄂申巴圖魯親率滿漢官兵連戰大敗之

殺賊七千有餘陣斬僞官以百計擒僞總兵閻標等一百七十二

員斬之下部議敘○甲申四川總督周有德奏僞總兵彭時亨等

領水陸賊兵三千犯廣元三面攻城甚急副將張登科等分率官

兵力戰大敗賊眾下部議敘○乙酉甯南靖寇大將軍順承郡王

勒爾錦奏宜都縣僞將軍劉之復穆升率賊船百餘陳兵江岸燒

白楊村副都統蘇虎濟署護軍統領圖爾度渾等率八旗官兵擊

敗之下部議敘○平南王尙可喜奏官兵恢復程鄉後鎮平平遠

二縣文武各官俱赴軍前投繳僞印僞札恢復二縣下部議敘○

丙戌江西總督董衛國奏閩賊侵犯甯都南贛總兵官劉進寶調
發遊擊周球等擊敗賊眾斬獲無算保全甯都下部議敘○丁亥
甯南靖寇大將軍順承郡王勒爾錦奏貝勒察尼將軍尼雅翰等
分部滿漢官兵水陸齊發進攻岳州賊將吳應麒等率賊七萬餘
陸路相拒我兵奮擊大敗之斬首萬餘舟師抵七里山以礮攻賊
沈其船十餘艘下部議敘○己丑奉命大將軍康親王傑書帥師
之浙江定西大將軍貝勒董額帥師之四川 上御太和殿賜敕
印命裕親王福全等分送出郊○廣東巡撫劉秉權奏賊首李唐
宗藏匿僞隆武敕印盤踞永安縣南嶺山巢值雲貴告變卽乘機
嘯黨蓄謀通逆隨發兵搜捕李唐宗勢迫投降卽於軍前正法遣
兵分路搜斬賊夥殆盡下部議敘○辛卯諭兵部耿精忠身雖背
恩反叛念其祖父投誠效力累世勳舊朕豈肯以耿精忠之罪及

其先人大兵平定閩省之日其祖父骸骨仍許收葬○是月免山東青城等十一縣旱災直隸霸州水災額賦有差

八月壬辰朔江西總督董衛國奏閩逆盤踞石城南贛總兵官劉進寶遣遊擊周球等擊敗賊眾恢復石城得旨嘉獎下部議敘○癸巳諭科爾沁公圖納黑我 太祖 太宗以來爾祖父同心效力佐定天下爾國賦稅聽爾自取若爾國窮苦朕加意撫養今聞調至爾所屬兵卒有掠取民物者在京尚如此况離此遠去豈不益肆搶奪爾久在行間務宜嚴禁兵卒毋得恣行強橫如有亂法者卽會同貝勒議行懲治且中夏炎熱爾眾早晚飲食各宜自慎以副朕軫恤軍士之意○諭兵部諸路大將軍止各給一印儻分兵赴剿別無印信則招撫賊寇宣諭百姓及調遣防守地方兩軍移會機宜何以爲憑其再給大將軍順承郡王勒爾錦印二至大

將軍康親王傑書處有將軍賴塔印一再給印一大將軍貝勒尙善處有將軍尼雅翰印一再給印一大將軍貝勒董額處既有將軍赫業瓦爾喀印二不必另頒若分兵他往卽以所頒印信付統兵者復合一處則收回所頒止用大將軍印○浙江總督李之芳奏耿逆兵在衢州杜澤大洲等處都司姚世熙守備晉大忠等兩路進剿大敗之又耿逆兵句連土賊從處州進逼金華副都統鄂申巴圖魯副將陳世凱率領滿漢官兵擊殺逆賊七千有餘生擒一百七十餘人追奔二十餘里獲器械旗幟無算下部議敘○甲午安遠靖寇大將軍貝勒尙善等帥師之岳州貝子準達等帥師之荊州上御太和殿賜敕印命和碩安親王岳樂等送之出郊○乙未諭兵部王師進剿湖南需用綠旗官兵總督蔡毓榮管轄通省可率所部兵隨王師協力平定地方又荊州地關緊要進兵

時大將軍順承郡王勒爾錦宜酌撥官兵防守○丙申湖廣總督
蔡毓榮丁父憂命在任守制○平南王尙可喜奏潮州叛鎮劉進
忠之黨劉斌據普甯都統尙之孝等遣兵進剿被陷知縣段藻潛
遣人通款誘賊出城迎戰因閉門拒之我兵斬殺甚眾恢復普甯
得旨嘉獎下部議敘○丁酉福建總督郎廷佐奏耿逆背叛勾連
海寇虛張聲勢但海寇止習水戰陸地非其所長宜剿撫兼施乘
機底定 上諭郎廷佐入閩之日海寇宜用撫耿精忠宜用剿或
用間相機便宜以行○平南將軍都統賴塔等奏逆賊侵犯金華
副都統喇哈等率領官兵自七月十三日至十八日止九次合戰
擒斬賊眾甚多恢復諸暨義烏二縣得旨嘉獎下部議敘○戊戌
兩河隄工告竣○庚子浙江總督李之芳奏臣標下隨征福建遊
擊王世望等率領官兵搜剿龍游逆賊擒斬甚多又嚴州副將鮑

虎率領官兵奮勇殺賊連奪要隘四處一日六戰六捷焚毀賊巢
恢復壽昌得旨嘉獎下部議敘李之芳又奏逆賊犯紹興之新昌
縣知縣陳大典乘間出奇殺賊全城賊犯郡城知府許宏勳率鄉
兵堵禦敗賊於郡城外嗣援剿守備吳良駿等兵分道截殺斬僞
總兵等賊遂遁走犯台州之仙居縣都司江國祥等擊敗之黃巖
土賊竊發守備王有功等斬獲無算下部議敘○壬寅平寇將軍
根特巴圖魯卒於軍命副將軍哈爾哈齊爲平寇將軍○海澄公
黃梧子芳度遣官黃藍問道齋奏進京奏言臣父於本年三月二
十六日病故臣不得已權以父命送敕命印於賊處仍密行招募
合舊兵共得六千餘名六月初四日斬僞城守都督劉豹等三人
保守漳州惟望大兵入閩救應臣偵知來路隨往迎接 上諭海
澄公黃梧自海上歸誠殫竭忠盡鎮守嚴疆勞績茂著據奏於三

月二十六日病故朕心深爲軫惻應得卹典從優議奏黃芳度設計全城招集兵卒斬僞都督劉豹等三人固守地方以俟大兵具見黃芳度能繼父志克篤忠貞殊爲可嘉黃芳度應令襲公爵今大兵由浙江江西廣東三路進閩黃芳度偵何處先到卽來迎會尋黃芳度兄一等侍衛黃芳世自陳生長閩地深知道里情形乞隨大兵進剿救援伊弟黃芳度 上因授黃芳世爲隨征福建總兵官今同平南王尙可喜兵進剿福建○參贊軍務護軍統領桑遏副都統席布奏耿逆遣賊兵自建昌前來大兵進剿至撫州擊敗賊眾斬殺甚多下部議敘○甲辰先是經略莫洛以秦省兵單請添設綠旗兵萬餘以資戰守 上諭增兵必須增餉國家錢糧止有此數茲大兵進剿浙江江西湖廣需餉浩繁爾經略所知前因餽運不給致王懷忠等兵逃散秦民供億入川兵餉已極勞苦

若增兵萬餘員勒經略又統諸軍深入萬一糗糧難繼恐禁旅有
匱乏之虞而綠旗兵復蹈前轍矣經略身在地方洞悉情形或不
煩增兵卽親行入川或必須議增方可進發或以秦省重要不必
親行遙措兵餉其逐一詳議以聞至是莫洛奏陝西舊兵內王懷
忠所率四千悉已逃散今王輔臣又率二千以行除此六千照額
招補外所增無多蓋增則戰守調遣均有裨益陝西得以保固故
臣以爲增之便若四川速定則錢糧有資而秦民又得息肩臣仍
宜親統官兵協力進剿平定四川從之○湖廣總督蔡毓榮奏逆
賊盤踞南漳縣天門寨等處襄陽總兵官劉成龍分守下荆南道
參政石琳率兵攻剿斬殺賊眾安撫各寨洞下部議敘○乙巳廣
東廣西總督金光祖奏水陸官兵四路往取梧州逆賊遁去追斬
甚多恢復梧州得旨嘉獎下部議敘○丙午 上幸南苑行圍○

丁未添設江南驛鹽道一管安徽等處驛鹽事駐安慶其管理通
省驛道改爲江蘇等處驛鹽道仍駐江甯○子故原任工部尙書
性納祭葬謚襄敏○己酉復設江南徽甯巡道駐徽州府○浙江
總督李之芳奏臣同平南將軍賴塔遣援剿總兵官李榮領兵至
金華進剿陣殺千餘生擒百五十餘焚木城副將鮑虎破賊五營
乘勝復淳安得旨嘉獎下部議敘○浙江提督塞白理奏黃巖圍
困請援甚急又南海象山新昌餘姚四縣賊眾蜂起恐賊踞甯海
斷我糧道請速救台州保守甯波得旨黃巖圍急杭州將軍喇哈
達已發兵赴援今大將軍康親王已領兵赴浙無庸別遣其甯海
等處賊眾作何剿滅並救台保甯之策康親王未到之先聽將軍
賴塔喇哈達等商酌以行○庚戌 上還宮○諭公圖納黑等近
聞蒙古兵違法搶掠其嚴加禁飭嗣後有不遵紀律者自驍騎以

下卽審明正法○辛亥 上手敕諭護軍統領桑遏江右爲粵東
咽喉江浙唇齒所關綦重今兵民之心尙持兩端若不翦滅地方
小醜大兵難以前進至袁州吉安贛州尤屬要地若有失陷則廣
東聲息必至梗阻廣東梗阻則勢益危急今滿兵駐袁州相機進
取長沙否則固守地方庶三府可保無虞將軍當親統重兵以行
毋使兵力單弱致有疏失○復設浙江杭嚴巡道駐嚴州府○丙
辰江西總督董衛國奏南贛總兵官劉進寶遣遊擊田振會同屯
墾都督陳平復萬年縣得旨嘉獎下部議敘○浙江總督李之芳
奏副將鮑虎復遂安縣參將洪起元等復嵊縣得旨嘉獎下部議
敘○己未 上御經筵○諭議政王大臣等聞岳州三面臨湖賊
於陸路一面浚壕築壘踞守頗堅難以進取應令將軍尼雅翰率
兵沿流赴江西與副都統甘度海兵合併率袁臨總兵趙應奎由

袁州進復長沙夾攻岳州相度便宜以行○庚申復設陝西關南
守道駐興安○辛酉浙江總督李之芳奏副都統胡圖臣標中軍
副將王廷梅統兵至石梁大溝源三路擊敗賊眾總兵李榮進剿
敗賊復東陽縣得旨嘉獎下部議敘○是月免直隸南皮山東禹
城等三十九縣旱災陝西莊浪衛雹災額賦有差

九月壬戌朔諭翰林院掌院學士傅達禮等日講關繫甚大今停
講已久若再遲恐致荒疏日月易邁雖當此多事之時不妨乘閒
進講於事無誤工夫不間裨益身心非淺爾衙門議奏尋翰林院
諸臣以幾務殷繁請間日一進講 上曰軍機事情有間數日一
至者亦有數日連至者非可限以日期其仍每日進講以慰朕惓
惓嚮學之意○江南總督阿席熙奏饒州賊犯徽州婺源縣諭徽
州係江浙接壤要地將軍額楚署副都統宗室巴爾堪等於揚威

將軍所統驍騎並江南將軍所轄兵內酌量率赴徽州堵剿逆賊
署副都統碩塔穆森以鎮守兗州滿洲蒙古驍騎移駐江南更發
京師滿洲蒙古每佐領驍騎一名以王府長史雅賴一等侍衛阿
喀尼爲署副都統率之往駐兗州○江西總督董衛國奏吳逆僞
將軍二人率衆數千犯長沙糾集羣盜聲製袁臨窺伺江西已
入袁州境內上諭袁州距吉安不遠吉安贑州又通粵要路今
賊入袁境將軍希爾根等停剿撫建諸賊分所部兵與將軍哈爾
哈齊率赴袁州與總兵趙應奎併力剿禦其希爾根所餘兵馬或
進剿撫建或固守南昌相機以行尋董衛國奏賊陷都昌復諭希
爾根董衛國趙國祚等速行剿滅江南安徽加意防禦○甲子湖
廣總督蔡毓榮奏叛賊楊來嘉等犯南漳官兵力戰大敗賊眾陣
斬僞弁兵目下部議敘○乙丑先是命碩塔穆森率師赴江南至

是因江南總督阿席熙奏賊逼祁門 上命碩塔穆森徑趨安慶
駐防尋又調湖廣提督王永譽爲安徽提督率所部兵往○湖南
巡撫張朝珍奏麻城劉青藜等結黨倡亂乘經就撫乃賊首鄒君
升復與大冶縣逃賊黃金龍作亂武昌知府于成龙等率兵堵截
擒殺賊首脅從餘黨俱已安插下部議敘○丙寅增陝西通省驛
傳道駐西安○增廣西右江道統轄柳慶思三府駐柳州○戊辰
上遣侍衛吳丹塞扈立傳諭甯南靖寇大將軍多羅順承郡王
勒爾錦朕手諭與王者再所言似合機宜又兩遣侍衛往未見王
回奏滿漢兵宜加撫恤餽餉亦不易若何進戰一在於王今所在
蠢動豈不可虞大將軍出征進止調度必待中旨於古未聞因王
等與賊相持朕不自暇逸屢有敕諭冀或有一當耳非朕欲從中
制也王等始出兵時兵亦不爲不足今四路進討王亦知之四川

兵取朝天關陽平關在保甯與賊相距與岳州同王等勿以四川
兵將抵貴州湖南兵可緩進保甯較岳州城更堅也康親王進勦
閩賊雖屢奏捷朕不爲喜吳三桂乃賊渠惟破岳州澧州方可喜
耳王等初至軍言馬未肥又言天熱多雨難行今當可行之時王
等規取岳州或渡江取澧州或令將軍尼雅翰往江西取長沙此
三事王與貝勒諸將帥熟議以聞勿惟朕諭與議政大臣之議是
從勉建良策欣聞捷音○己巳平南王尙可喜奏副都統尙之節
等統兵自程鄉縣間道進閩沿途相機勦撫不煩兵戈逆賊望風
逃遁僞官弁繳札投誠恢復大埔縣直抵三河壩得旨嘉獎下部
議敘○副都統擴爾坤等奏僞將軍吳之茂自保甯府至昭化縣
會同僞總兵彭士亨率賊五千餘乘船來犯廣元入旗官兵偕四
川總督周有德等標弁夾擊大敗之斬僞遊擊徐應昌賊夜遁下

部議敘○經略莫洛奏臣於本月十一日由秦州進川貝勒等到西安時養馬繼發請命四川總督周有德巡撫張得地副都統擴爾坤等固守朝天廣元諸處轉運大兵糧糗並敕將軍等拒守保甯以待大兵之至 上諭經略莫洛身在地方軍機緩急自有確見可與將軍席卜臣前往廣元進取昭化疏通糧運平定四川總督周有德巡撫張德地副都統擴爾坤等於經略未到之先將廣元所有糧米運送軍前又廣元兵少甚屬可虞或令席卜臣兵先赴廣元秣馬以待或候經略同發俱令莫洛酌行又諭郿嶺大二郎小二郎諸處俱係險要周有德張德地擴爾坤等酌撥官兵卽移會莫洛席卜臣酌量調度○辛未 上幸南苑行圍○增四川督糧道兼管鹽茶驛傳事駐省城○平南王尚可喜奏逆賊劉進忠抗不受撫官兵在新亨地方剿殺僞副將陳璉等七月十五日

賊眾五千乘風雨衝突官兵奮擊斬賊八百人下部議敘○壬申
增湖北驛傳道兼管鹽法事駐省城○癸酉江南總督阿席熙奏
徽州府及歙祁門等縣陷賊江甯將軍額楚率兵赴徽州進剿
上諭江甯所駐大兵將軍額楚既率赴徽州江省係水陸要地卽
令署副都統雅賴阿喀尼等停往兗州率兵徑赴江甯其駐紮兗
州漢軍都統釋迦保俟京師新發禁旅到日亦率兵速赴江甯在
京滿洲蒙古每佐領驍騎一名每翼委署副都統一員漢軍每佐
領發兵二名其派副都統一員每翼委參領一員率赴兗州駐紮
尋以一等侍衛諾敏長史岳爾多爲署副都統並遣漢軍副都統
孫承祖率兵往○乙亥江西總督董衛國奏龍泉萬安等處逆賊
盤踞僞將軍陳昇賊首郭應鼎王世彪等率賊萬餘欲取贑州副
都統甘度海領兵大敗賊眾於龍泉縣西北陣斬僞總兵郭龍李

良下部議敘董衛國又奏定南將軍內大臣希爾根平寇將軍哈爾哈齊等圍撫州僞易都督過河來援迎擊大敗之城內賊兵突出官兵奮擊斬殺甚多下部議敘○戊寅浙江提督塞白理奏黃巖失陷總兵官阿爾泰從賊 上諭康親王傑書先勦溫州黃巖諸處賊寇平定地方然後進剿福建○定南將軍希爾根奏吳逆遣賊來犯袁州耿逆竊踞廣信等府今若分兵進剿恐兵單不利上諭署副都統碩塔穆森不必駐皖速赴南昌到日令署副都統穆承格率南昌兵速赴袁州與總兵官趙應奎併力固守署副都統公倭赫救進賢兵回日亦赴袁州若大兵未到之先賊勢猖獗趙應奎相機退保險隘以待大兵之至將軍尼雅翰將所率江甯兵及碩塔穆森兵酌量率赴袁州統領副都統甘度海倭赫穆承格等兵平定袁州進取長沙如吉安無警其甘度海兵聽尼雅

翰調度酌遣又安慶係要地漢軍都統釋迦保署副都統雅賴阿喀尼俱率兵速赴安慶並趣提督王永譽剋期抵任如安慶等處有警令將軍阿密達華善等相機救應○己卯諭議政王大臣等江南天下要地兵力單薄其授和碩簡親王喇布爲揚威大將軍派兩佐領合出護軍一名上三旗包衣佐領兵每旗百名復令簡親王除伊包衣佐領全軍外將所部人眾酌選披甲率往江甯統轄將軍阿密達兵及江南滿洲蒙古漢軍相機調度保固全省將軍阿密達額楚華善王之鼎總督阿席熙並同參贊又河南地廣兵少恐奸宄乘閒竊發令每佐領出驍騎二名授侍衛坤巴圖魯爲振武將軍率赴汝甯駐防左翼遣副都統覺羅夸代右翼以長史阿爾瑚爲署副都統偕行又諭簡親王到江甯時令副都統蘇朗率蒙古兵一千往鎮安慶其安慶都統釋迦保率所部漢軍速

赴南昌鎮守到日南昌署副都統碩塔穆森兵往袁州會合將軍尼雅翰等兵與總兵官趙應奎合力剿禦若蘇朗兵到安慶時署副都統雅賴阿喀尼率所部兵亦速赴南昌鎮守○庚辰浙江巡撫田逢吉奏賊屯僂居縣朱溪地方都司汪國祥遣兵會同僂居縣知縣鄭錄勦分路進剿陣斬僞都司王宗興殺逆賊三百餘又叛賊曾養性祖宏勳密遣人投送逆書汪國祥卽時舉首下部議敘○辛巳江西總督董衛國奏南贛總兵官劉進寶遣兵復崇義縣得旨嘉獎下部議敘○癸未 上還宮○甲申江南總督阿席熙奏逆賊自績溪縣西北分道來犯江南將軍額楚分兵迎擊擒斬賊眾不可勝數復績溪縣得旨嘉獎下部議敘○定南將軍希爾根奏賊於本月初七日夜來犯大營官兵分路迎擊敗之十一日復撫州尋又奏閩賊東踞建昌滇賊西犯袁州勢難分應若臣

舍建昌而援袁州恐撫州已復旋棄江右何日可定仍宜合力以勦建昌之賊上諭撫州雖不可棄袁州亦屬要地希爾根兵可破建昌則進若難以徑進且鎮守撫州令將軍哈爾哈齊仍率兵援袁州至於所復地方更令總督提督發新募兵速赴將軍軍前以資守禦○浙江總督李之芳奏逆賊僞都督陳重帶領閩賊招土寇僞總兵朱老四等結巢金華之鄭店劫掠山口副將陳世凱等會同副都統馬哈達石調聲率兵直抵山口擊敗賊眾連夜窮追至鄭店渡河齊進三路夾剿斬賊五千餘生擒百六十人焚毀賊巢篷廠二百餘處下部議敘○四川總督周有德奏逆賊僞將軍何德成率兵二千自昭化赴二郎關欲截糧餉官兵奮勇敗賊生擒僞都司加騰龍護糧送至軍前下部議敘○乙酉平南王尙可喜奏績順公沈瑞不甘從逆挈家回粵情屬可憫命復還原爵

仍管伊標官兵駐紮廣東○廣東廣西總督金光祖奏廣西提督馬雄左江總兵官郭義俱降賊廣西全省變動 上命安親王岳樂爲定遠平寇大將軍率每佐領護軍一名坤巴圖魯侍衛所帶每佐領驍騎二名並王所屬包衣佐領護軍驍騎速赴廣東令都統覺羅畫特伯郎肅副都統吉圖喀朱喇禪偕往以郎肅爲署護軍統領兵至江西日或由袁州進取長沙平定廣西或徑抵廣西勦滅叛逆聽大將軍王與都統等商酌以行又每佐領出驍騎一名付坤巴圖魯侍衛隨後率往汝甯尋又命輔國將軍瓦山隨大將軍安親王進討○丙戌將軍額楚奏敗賊績溪克復縣城乘勝進至徽州賊望風遁郡城遂復命額楚等留兵駐徽速行進取饒州會合江西大兵○己丑以溫良郡王孟義子佛永輝襲溫郡王○庚寅江西總督董衛國奏逆賊侵犯興國總兵官劉進寶調屯

都督許貞等率兵救援大破之又逆賊曾若干犯石城署中軍事管天祥等同署縣事李德明等率領兵民奮擊大敗賊眾下部議敘

冬十月壬辰揚威大將軍簡親王喇布帥師之江甯 上御太和殿賜敕印詣 堂子行禮祭旗纛還出西長安門送之行○癸巳奉命大將軍康親王傑書奏福建逆賊一萬四五千入犯遂安遂安土賊王應茂等率賊兵四千沿河傍山遙爲犄角嚴州副將鮑虎率兵擊之斬僞參將王師古等殺賊千百七十餘級乘勝追殺二十餘里下部議敘○增盛京每旗防禦各一○乙未定南將軍希爾根奏耿精忠僞將軍陳昇及土賊郭應定等犯贛州副都統甘度海等統兵迎擊大敗之斬僞總兵柯隆李良又追敗賊兵於龍泉縣石灰澳隘口破其三營參將塞勒等追北二十里直抵曹

林賊巢攻取二十餘寨下部議敘○丙申定遠平寇大將軍安親

王岳樂帥師之廣東上御太和殿賜敕印詣

太子行禮祭旗

憲還出西長安門送之行○以王繼文爲雲南布政使由侯補參政道遷

○戊戌安徽巡撫靳輔奏建德縣被饒逆竊踞副都統碩塔穆森

等統兵進剿恢復縣城得旨嘉獎下部議敘○己亥以郎永清爲

河南布政使原任湖廣布政使○庚子調宋得宜爲吏部左侍郎管右侍

郎事由戶部調○辛丑江西總督董衛國奏賊犯湖口尋安徽巡撫靳

輔奏湖口彭澤相繼陷浮梁鄱陽賊聚日眾上命署副都統雅

賴阿喀尼到安慶卽統兵馳赴彭澤湖口剿賊碩塔穆森已至九

江令與雅賴阿喀尼等合兵平定湖口協取饒州卽赴南昌○壬

寅上奉太皇太后幸南苑○乙巳平南王尙可喜奏省會兵

單根本虛弱李三官七乘機竊發雖旋卽埽蕩尙有黨羽潛伏急

宣艾除臣調總兵班際盛自梧州回省 上諭梧州兩粵接壤要地今粵西有事之際李三官七賊寇滅後尚可喜卽增兵令班際盛速赴梧州勦禦○丙午添設山東驛傳道駐省城管通省驛傳事濟東道自省城移駐德州管濟南府屬併東昌府之聊城等九州縣衛東兗道駐沂州管兗州府屬併東昌府屬之堂邑等九州縣○丁未以徐養仁爲廣東布政使由糧道遷○陝西總督哈占奏四川賊眾先立營於甯羌州文廟山參將陳應奎等夜襲賊營賊眾大亂遁回南山 上命莫洛遣副將雷繼宗及提督王輔臣兵固守甯羌諸處大將軍貝勒董額等進川時若甯羌有賊便道翦滅再入四川○命大將軍順承郡王勒爾錦發兵守九江○辛亥上奉 太皇太后還宮○癸丑以嚴沆爲倉場侍郎由左副都御史遷

率賊兵二萬由常山謀犯衢州平南將軍賴塔總督李之芳令副都統喇哈胡圖等統兵於九月十七日擊敗賊眾於焦園等地方斬賊萬餘下部議敘○己未諭議政王大臣等自吳三桂叛逆以來平南王尙可喜爲國抒忠厥功茂著當茲粵東軍興之際督撫提鎮以下俱聽王節制嗣後補授文武官員聽王選補奏聞其一切調遣兵馬及招撫事宜亦聽王酌行○安徽巡撫靳輔奏饒州逆賊竊踞彭湖二縣徽州營副將姚宏信守備李剛等兵從間道往勦大敗賊眾於建德縣鄭坑鋪擒斬甚眾下部議敘○平南王尙可喜奏逆賊劉進忠盤踞潮州恃海賊爲應援今海賊直薄城東劉逆屢出城來犯總兵官王國棟等率兵三戰三捷斬獲甚多下部議敘

十一月庚申朔先是 上命將軍尼雅翰及都統釋迦保等進取

南康赴南昌署副都統碩塔穆森雅賴阿喀尼等進取湖口彭澤
都昌撫定其地再取饒州赴南昌至是定南將軍希爾根等奏賊
犯撫州等處臣令副都統席布前往應援又調鎮守九江城守尉
鄂黑等前往會城得旨將軍尼雅翰等兵各遵指授速定地方星
赴南昌至九江扼要重地如城守尉鄂黑等前往省城將軍希爾
根總督董衛國等卽酌發官兵鎮守大將軍安親王速赴江西酌
量調度○經略莫洛奏廣元大兵缺餉兩月略陽糧艘爲賊所劫
賊踞七盤朝天諸關我師餉道梗塞 上命莫洛率兵速赴七盤
朝天等處會同將軍席卜臣剿滅賊寇疏通餉道進取昭化協力
克復保甯尋總督哈占奏蜀中水陸賊阻糧運難繼且逆賊窺伺
陽平諸處 上諭大兵徂征惟餉是賴今旣糧運難繼我師未便
久駐令大將軍貝勒董額經略莫洛四川總督周有德巡撫張德

地等撤保甯兵回廣元經略等親身殿後調廣元兵回漢中固守陽平等處殲除甯羌諸賊整頓士馬再圖恢復○議政王大臣等奏經略莫洛若進四川西安空虛應發大兵駐防 上諭河南府乃四達之地距潼關鄆襄皆近駐師其地則所在有警俱可策應其遣副都統塞格並令一等侍衛鄂克濟哈署副都統率每佐領驍騎三名往駐河南府○辛酉以王啓元爲內閣學士由內閣侍讀學士遷○甲子轉魏象樞爲戶部左侍郎以于可託爲戶部右侍郎由副都御史遷○丁卯太白星見○戊辰鎮南將軍尼雅翰奏耿逆僞都督李大元等率賊萬餘屯南昌崖口臣偕副都統綽克托等於十二月二十二日率兵擊敗之復南康府得旨嘉獎下部議敘○定南將軍希爾根奏副都統穆成格總兵官趙應奎等率兵復萬載縣得旨嘉獎下部議敘○己巳 上步隨 皇太后輦詣 太宗懿靖

太貴妃問疾○諭安遠靖寇大將軍貝勒尚善等覽吳丹所齋爾
等奏疏朕心深爲嘉悅兩貝勒皆朕懿親運籌決策破賊立功在
指顧間朕遙度機宜於爾等疆場之事或有裨益特頒手詔示爾
爾等請調荊州綠旗甲兵備用細思順承郡王渡江攻戰未有定
期王若不渡江則滿洲蒙古甲兵鎮守荊州彝陵原無不足今檄
蔡毓榮標兵往岳州又據吳丹口奏賊浚重壕相拒甚堅今令綠
旗兵以車運土塞填壕赴戰隨遣滿洲蒙古精兵繼進攻取必獲
全勝綠旗兵宜深加撫恤至臨陣時明諭賊人有解甲來歸者卽
與保全恩養安插朕未親履行間但披覽輿圖據臆懸斷所期爾
諸將等恩威公溥無間親疏嚴飭哨探申明法紀速成破賊之功
永表旗常之績爾等所有籌畫卽行密奏兩貝勒及大臣等兵士
無恙併奏以聞○湖廣總督蔡毓榮奏竹谿本無縣城文武官民

戶部右侍郎遷

據守桐溪中峯二寨逆賊楊來嘉等合謀侵犯致中峰寨失陷今
桐溪寨告警亟請附近兵應援 上諭竹溪去陝西白土關甚近
經略莫洛總督哈占巡撫杭愛提督王輔臣等速令汛防官兵就
近應援鄖陽提督佟國瑤遣協勦官兵馳救都統范達禮副都統
德業立等嚴加固守相機堵勦毋致蔓延○庚午田逢吉以病解
任命總理浙江兵馬糧餉以達都爲浙江巡撫由戶部右侍郎遷○辛未
諭兵部凡陷賊地方皆我赤子今者詰爾戎兵四征不廷原以除
暴安民念愚氓被脅蓄髮特一時貪生畏死之恒情若大兵所至
槩行誅戮非朕救民水火之意百姓無由自新狡賊反得藉以煽
誘嗣後大兵進剿有鄉民持械拒敵及竊踞城池山寨不卽迎降
婦女多係擄掠脅從破賊之後凡所擄難民子女許民間認領不

得一槩妄收爾部其傳諭滿漢官兵咸體朕意毋忽○癸酉以金
雋爲左副都御史由大理寺卿遷

○甲戌江西總督董衛國奏臣標右營

遊擊佟國棟率兵復新昌縣得旨嘉獎下部議敘○乙亥 太宗

懿靖太貴妃薨

上步隨

皇太后輦進太妃宮舉哀輟朝五日

○庚辰平南王尙可喜奏續順公沈瑞副都統鄧廣明及官兵家
口共二千餘人爲叛鎮劉進忠驅入福建拘留漳浦恐大兵進剿
玉石難分得旨續順公沈瑞家口被賊拘留殊爲可憫此係有功

之人理應保全令大將軍王等進剿恢復之日留意察訪保護得

所○奉命大將軍康親王傑書等奏耿逆下僞都督徐尙朝等率

馬步賊五萬至金華府城外列二十餘營副都統馬哈達白吉察

渾都統巴雅爾總兵官李榮等領兵夾擊陣斬賊將吳榮先等三

十餘人賊兵二萬餘人下部議敘○平南王尙可喜奏副都統尙

之孝等進兵潮州府攻剿逆賊劉進忠克東津筆架山洗馬橋等處巡撫劉秉權署總兵官王國棟等破潮州城南鳳凰洲木城二座斬僞都督金漢臣等殺賊五千餘副將何九衢等復潮州澄海縣得旨嘉獎下部議敘○諭兵部據平南王尙可喜奏稱伊孫女嫁爲耿精忠子婦年未二旬忽遭事變王係勳舊大臣爲國勤勞忠蓋茂著其孫女宜予保全我兵剿平閩省之日大將軍王等務留心察救給王團聚○乙酉鎮南將軍尼雅翰奏吳逆僞朱將軍與僞總兵黃乃忠合兵數萬自萍鄉來犯袁州副都統甘度海署副都統公倭赫穆承格總兵官趙應奎率兵於本月初四日敗賊於西村斬萬餘級又登山擊敗賊眾斬五千餘級下部議敘○丙戌以介山爲戶部右侍郎由大理寺卿遷○丁亥諭兵部往者令總督蔡毓榮率兵會同都統范達禮等協剿楊洪二逆今蔡毓榮旣赴岳

州二逆可暫停進剿除副都統宜思孝柯彝率兵駐防鄖陽均州
外令襄陽總兵官劉成龍率兵鎮守南漳雲南提督胡拜率綠旗
官兵及駐紮襄陽漢軍鎮守穀城都統范達禮副都統德業立仍
守襄陽若更有險要之地令范達禮等酌量調守賊出犯時卽相
機剿禦俟大兵平定湖南范達禮蔡毓榮等仍進剿楊洪二逆○
戊子諭奉命大將軍康親王傑書浙江賊寇在在竊發騷擾地方
皆由耿逆未滅之故若剿除耿逆則小醜自滅今或固守金華諸
處由仙霞嶺分水關入閩或固守杭衢從金華進克溫處平定浙
省剿滅閩賊聽大將軍酌量速行○是月免江西南昌等十二州
縣山東棲霞等六州縣水災河南信陽等六州縣旱災額賦有差
十二月庚寅朔奉命大將軍康親王傑書等奏南海將軍貝子傅
喇塔遣兵至台州探知耿精忠下僞都督僉事曾璽僞總兵陳理

屯黃瑞山追擊之殺賊千七百餘斬僞副將陳鵬等七人生擒僞
守備以下百餘人盡毀賊營下部議敘○署朝鮮國事李焞遣使

告其父王李樞喪貢方物○辛卯以杜臻爲內閣學士由翰林院侍讀學士

由翰林院侍讀學士

○湖廣巡撫張朝珍奏吳逆僞遊擊何士榮由長沙走黃岡縣

糾黨爲亂黃州知府于成龍率官兵鄉勇勦之生擒何士榮下部

議敘○癸巳先是將軍額楚奏婺源爲賊所據如不取婺源卽赴

饒州恐賊知大兵已去又犯徽州請復婺源後相機進取至是額

楚奏十一月十七日復婺源一二日間安撫殘民卽進取饒州得

旨嘉獎○甲午參贊軍務署副都統雅賴阿喀尼等奏官兵敗賊

於小姑山水關賊固守彭澤縣我師奮勇克之得旨嘉獎下部議

敘○乙未以田六善爲左副都御史由順天府尹遷

○丙申諭定西大

將軍貝勒董額等覽將軍赫業等奏保甯大兵糧餉阻絕困乏已

極經略莫洛於十一月二十八日帥兵啓行貝勒等行期在十二月初三日莫洛所統之兵俱係綠旗巴蜀山路險惡滿洲大兵若不相繼進發恐賊輕視漢兵首尾互擊難以策應今保南大軍惟貝勒等是賴敕諭一到貝勒等卽兼程而進會同經略莫洛速定昭化接濟大兵勿得遲緩貽誤大計○吏部議覆廣東巡撫劉秉權奏分巡廣肇南韶道改爲分巡南韶道駐韶州府轄南韶二屬分守高雷廉羅道改爲分守廣肇道駐肇慶府轄廣肇二屬新設分守高羅道駐高州府轄高羅二屬新設分巡雷廉道駐廉州府轄雷廉二屬從之○增定武職陣亡卹贈例○浙江總督李之芳奏賊逼金華台吉察渾副都統石調聲等破賊竹園村都司陳夢暘等破賊季宅馬澗殺僞遊擊等六名賊兵二千餘生擒僞遊擊等三名下部議敘○丁酉封仁孝皇后父噶布喇一等公世

襲○先是滇賊圍安福縣鎮南將軍尼雅翰等遣副都統甘度海前往援勦至是江西總督董衛國奏安福陷得旨將軍尼雅翰總督董衛國速檄甘度海勦滅賊寇至遣發將軍等原令保固江西全省非止鎮守所駐城池嗣後所轄地方告警卽酌行調遣應援○奉命大將軍康親王傑書奏耿逆下僞總兵桑明等領賊五萬餘犯衢州將軍賴塔遣兵於十一月二十四日連擊敗之殺賊萬餘下部議敘○庚子定西大將軍貝勒董額奏是月初四日提督王輔臣兵叛於甯羌州劫經略營經略標下官兵或敗走或從逆經略莫洛不知下落臣等兵阻不能前進退保漢中 上諭大學士等王輔臣兵叛人心震動醜類乘機竊發亦未可定前者各將軍大臣不遵指授互相觀望遷延不進以致逆賊得據大江之南賊渠未滅故又有此變朕欲親至荊州相機調遣速滅賊渠吳三

桂若吳三桂既滅則所在賊黨不攻自息生民得安爾等與議政
內大臣密議以聞尋議覆 聖駕親征滅賊誠易但 皇上身關
天下之重若 鑾輿前往恐奸宄妄布流言事生意外况京師根
本所繫非輕 皇上不宜輕出止可居中運籌指授內外臣工相
機調發 上曰卿等所言亦是朕且暫止親征王輔臣兵叛不可
不速發大兵前赴西安保固秦省先令署副都統鄂克濟哈等所
率之兵分遣西安興安今且停往興安若遣往西安兵尚未起程
卽於全部兵內擇馬壯者每佐領二名鄂克濟哈星夜率赴西安
餘每佐領兵一名令副都統塞格率駐河南府鄂克濟哈兵力尙
單將軍坤巴圖魯侍衛率所屬兵盡赴西安與鄂克濟哈副都統
翁愛總督哈占保守地方剿禦賊寇襄陽見有都統范達禮副都
統李林隆之兵其副都統德業立應率每佐領驍騎一名星赴西

安與坤巴圖魯侍衛等台兵並移文順承郡王度襄陽可虞卽撥
王所統兵每佐領一名遣往駐守否則不必遣往王與參贊各大
臣公同商議酌行哈占翁愛等於大兵未到之先併力固守地方
仍偵探情形不時馳報○諭安遠靖寇大將軍貝勒尚善等王輔
臣標兵反叛貝勒董額等退守漢中今當人心惶惑之時若克復
岳州則人心自定稍有遲緩則所在搖動倍多可虞貝勒等何日
決戰宣酌定必得之機其速定議以聞○諭兵部據報王輔臣兵
變其反與否尙未得實卽王輔臣果反或出一時迫脅亦未可定
其妻孥俱善存撫勿遽加害傳諭總督哈占知之○諭兵部京師
禁旅遣發頗多其調盛京官兵一千令副都統鄂泰帥之至京烏
喇兵七百令副都統安珠護遣章京帥赴盛京其甯古塔兵令將
軍巴海調發鎮守烏喇○辛丑諭兵部秦省重要令理藩院員外

郎拉篤祜圖爾哈圖鼐滿代往調鄂爾多斯蒙古兵三千五百歸化城土默特兵七百視西安路近卽率赴西安若去省城逕遠卽率赴蘭州其蒙古兵入河關口令總督哈占巡撫花善遣人接應芻糧如秦省可虞速催調兵前往若叛兵已散秦省無虞卽移文停止其以鄂爾多斯貝勒索諾慕歸化城土默特都統古魯率兵前往○壬寅諭禮部古帝王撫御天下莫不以禮教爲先務然釐定章程必文質適中方可昭垂永久前見風俗近奢恐漸流於僭濫故令更定條例一切服飾力崇儉樸冀返淳龐詎意有司奉行過當專事苛細僭端紛擾以致商賈壅滯物力匱絀小民深爲不便以後著仍照康熙九年定例遵行見今一應禁約俱行停止○調平寇將軍哈爾哈齊赴江甯參贊大將軍簡親王軍務鎮守江南○奉命大將軍康親王傑書奏參將滿進貲紹興知府許宏勵

等敗賊岷縣之長嶺桂門山嶺殺賊千七百餘生擒僞軍師邱爾
章僞將軍馬玉等招撫僞總兵馬瑞之等下部議敘又奏耿逆下
僞總兵王飛石等統賊七千餘犯淳安嚴州副將鮑虎擊之於圓
屏鎮殺賊二千二百有奇生擒王飛石等僞副將江明等招撫僞
副將江誠等安插被難人民歸籍下部議敘○甲辰子故原任兵
部尚書王宏祚祭葬謚端簡○乙巳諭陝西總督哈占適據貝勒
董額等報經略莫洛提督王輔臣標下官兵叛變隨科臣蘇拜
特諭招撫爾卽遵旨通行曉諭以身肩任加意安輯念倡亂官兵
皆因蜀道險遠糧餉不繼以致畏死情迫頓生變亂誰肯甘心從
逆自造釁殃其不得已之情朝廷俱已洞悉今特遣官前來安撫
諭旨甚明有如皎日伊等各有父母妻子恒產如能遵旨來歸官
職如故願爲兵者仍許入伍願歸農者令回原籍安插哈占等係

信任特用之臣務體朕至意速行撫諭早定地方○達都以年邁且不識漢字辭浙江巡撫舉浙江布政使陳秉直自代得旨陳秉直升補浙江巡撫達都仍以原銜照舊料理浙江糧餉事務○丙午諭議政王大臣等王輔臣標兵作叛廣元保甯大兵闖繫甚重應遣兵接應若調將軍坤巴圖魯侍衛等兵及西安兵發往恐王輔臣回據平涼西安兵力單弱應以京城所發兵每佐領三名速催起程其羸瘠馬匹暫留太原秣養選壯健者星夜馳赴西安於各大兵內酌量留守西安餘兵速遣赴大將軍貝勒軍前接應廣元保甯大兵回至漢中○江南將軍額楚奏部文令臣等俟安親王到江西率兵回江甯今安親王將到臣等酌量養馬仍回江甯得旨大將軍簡親王喇布將軍華善率兵駐守江南額楚兵既抵江西卽於南昌駐牧不必仍回江南俟安親王前抵南昌額楚兵

或赴撫州與將軍希爾根合兵進取建昌廣信或會同王師進剿
或駐守南昌聽大將軍王指授○丁未奉命大將軍康親王傑書
等奏參將陳夢陽敗賊蘭谿之東埜山斬僞總兵宋書聘生擒僞
副將吳維景等下部議敘又報紫鄉山餘寇盤踞十八汀磯等處
夸蘭大拜色副將牟大寅等率領官兵進剿屢敗逆兵生擒僞總
兵楊茂林等斬之下部議敘○平南王尙可喜奏楚逆李漢英糾
集餘眾復犯連州遊擊李有才知州李贊等擊敗之下部議敘又
奏劉逆遣黨踞揭陽縣碣石總兵官苗之秀等往剿復揭陽潮陽
二縣得旨嘉獎下部議敘○戊申先是 上以秦省重要令駐江
甯揚威將軍阿密達率護軍四十名赴河南府併統副都統塞格
之兵暫駐鎮守俟每佐領四名兵到率赴西安至是諭阿密達等
卽率副都統塞格兵速赴西安京師所派每佐領兵四名以一名

令夸蘭大等率赴河南府聽副都統塞格轄其三名以達禮善巴圖魯署副都統率之由山西赴西安○諭議政王大臣等陝西興安州西近漢中北接潼關東南直逼鄖襄最爲要地今秦中有警特遣大兵鎮守其副都統穆舒渾帶至襄陽之兵及蒙古甲兵增足一千令雲貴總督鄂善副都統希福率赴興安保固漢中諸處穆舒渾仍回荊州至於興安襄陽地係接壤應令張犄角之勢有警卽互相應援都統范達禮副都統李林隆提督胡拜等鎮守襄陽穀城如兵力單薄大將軍順承郡王等酌量遣兵協守尋諭若俟鄂善希福到日方行遣發恐致遲緩卽令穆舒渾於諭到之日起所部兵馳赴興安鄂善希福亦於諭到之日起蒙古兵馳赴興安與穆舒渾同守漢中諸處○諭兵部奏省告警三晉接壤之地應設提督以資彈壓著以山東援剿提督周卜世爲山東提督統

轄全省率標下官兵駐平陽府○江甯將軍額楚等奏臣等十一月二十日自婺源進取饒州行至樂平縣段家村有叛賊陳參將率眾拒敵副都統巴爾堪率兵迎擊擒獲甚眾乘勝復樂平縣賊糾集餘眾邀我師於鄱陽雲吉峯下又大破之遂至饒州賊棄城遁入湖中前隊巴特瑪等追擊三十餘里盡殲餘黨恢復郡城得旨嘉獎下部議敘○平南王尚可喜奏臣年老衰病請速發滿洲大兵彈壓全粵 上命將軍尼雅翰率所部兵同副都統綽克托速赴平南王軍前協守粵東○己酉定遠平寇大將軍安親王岳樂奏吳逆下僞總兵張泰踞安福縣副都統穆承格參將塞勒等統兵進剿殺賊五千餘復安福縣得旨嘉獎下部議敘○庚戌河南巡撫佟鳳彩以疾乞休允之○奉命大將軍康親王傑書等奏賊犯天台甯海將軍貝子傅喇塔等遣夸蘭大席密納等連破賊

於紫雲山九里寺山等處殺賊千餘下部議敘又奏十二月初一
日耿逆下僞都督徐尙朝等率馬步賊三萬土寇二萬犯金華都
統巴雅爾副都統馬哈達總兵官陳世凱等於積道山連戰敗之
攻破木城殺賊二萬餘招撫僞官兵七百餘人下部議敘○廣東
廣西總督金光祖奏逆賊孫延齡屢遣賊兵犯懷集縣官兵六戰
皆捷斬獲甚多又犯欽州遊擊王嘉賢等擊之殺賊千三百餘下
部議敘○辛亥定南將軍希爾根等奏賊踞江西東鄉縣界前鋒
統領覺羅舒忽擊之斬賊千餘餘眾潰遁下部議敘○陝西總督
哈占奏經略莫洛標下中軍官吳石珊自棧道逃回云經略駐兵
甯羌州南教場本月初四日王輔臣標兵猝叛攻營經略親隨滿
兵併力射卻之旣而王輔臣身自督戰眾遂復攻敵矢齊發經略
莫洛中鳥槍死章京筆帖式等或逃出或爲賊所殺初七日王輔

臣率叛兵至沔縣欲與貝勒戰值標下五百兵及經略標兵並各處運糧兵共二千餘一時星散王輔臣勢孤遂回略陽下部知之○壬子敕諭王輔臣近據總督哈占奏稱進剿四川軍中譟變爾所屬部伍潰亂朕聞之殊爲駭異朕思爾自大同隸於英王後歸入正白旗世祖章皇帝知爾賦性忠義才勇兼優拔於儕伍之中置之侍衛之列繼命爾隨經略洪承疇進取滇黔爾果能殫心抒忠茂建功績遂進秩總戎寵任優渥迨及朕躬以爾勳舊重臣嚴疆攸賴特擢秦省提督來京陛見面加訊問益悉爾之忠貞天稟猷略出羣朕心深爲嘉悅特賜密諭言猶在耳想爾猶能記憶也去冬吳逆叛變所在人心懷疑觀望實繁有徒爾獨首倡忠義舉發逆札擒捕逆差遣子王繼貞馳奏朕召見爾子面詢情形愈知爾之忠誠純篤果不負朕知疾風勁草於今見之後爾奏請入

觀面陳方略朕以爾忠悃夙著深所倚信且邊疆要地正資彈壓
是以未令來京經略莫洛奏請率爾入蜀朕以爾與莫洛和衷共
濟毫無嫌疑故令爾同往建功茲兵變之後面諭爾子始知莫洛
與爾心懷私隙頗有猜嫌致有今日之事則朕之知人未明俾爾
變遭意外忠蘆莫伸咎在朕躬於爾何罪朕之於爾誼則君臣情
同父子任寄心膂恩重河山以朕之惓惓於爾知爾之必不負朕
也至爾所屬官兵被調進川征戍困苦行役艱辛朕亦悉知今變
起倉卒情非得已朕惟加矜恤並弗致譴頃已降諭令陝西督撫
招徠安插並遣爾子往宣朕意恐爾尙懷猶豫茲特再頒專敕爾
果不忘累朝恩眷不負平日忠忱翻然悔悟斂戢所屬官兵各歸
隊伍卽令率領仍還平涼原任已往之事槩從寬宥或經略莫洛
別有變故亦係兵卒一時憤激所致並不追論朕推心置腹決不

食言勿心存疑畏有負朕篤念舊勳之意○海澄公黃芳度奏臣
感念國恩誓不與賊俱生練勁卒滿萬堅守漳城及龍溪五縣耿
逆潛師援漳浦臣分兵邀擊賊眾大潰鄭逆復遣僞侍衛及叛鎮
趙得勝來攻漳浦乞發大兵不拘何路進閩與臣會合併力埽除
得旨黃芳度堅守孤城練兵殺賊屢次間道陳奏忠貞可嘉平南
王尚可喜進兵克復潮州卽發兵應援黃芳度平定閩省大將軍
康親王傑書將軍希爾根亦由浙江江西作速進剿福建大兵一
到先移知黃芳度速赴會合○陝西總督哈占奏陝西百姓供應
芻糧疲於奔命請令山西就近輸運得旨山西運糧水路則有黃
河汾渭之險陸路輸輓道遠勞費民不能堪著支戶部庫銀十五
萬兩擇能員解至西安採辦秦民正值困苦之際大兵需用芻糧
若價值稍增民爭什一之利自樂於輸送庶不至有誤軍需儻有

不肖官員苛派侵剋使民不得均霑實惠督撫指名劾奏從重治罪○丙辰定遠平寇大將軍安親王岳樂奏副都統雅賴阿喀尼等復都昌縣疏通河道招撫康山餘黨得旨嘉獎下部議敘○是歲朝鮮琉球來貢○人丁戶口一千七百二十四萬六千四百七十二田地山蕩畦地五百三十萬八千七百五十六頃六十二畝徵銀二千四百二十一萬六百五十三兩三錢有奇米豆麥五百五十三萬二千五百三十二石八斗有奇草二百二十九萬一千三百六十五束茶十六萬二千七百四十引行鹽四百六萬九千三百八十五引徵課銀二百四十八萬七千五百七十二兩三錢有奇鑄錢二萬九千三百四十七萬七千五百三十有奇